



B
128
C82C475
1793
V. 2





Digitized by the Internet Archive
in 2021 with funding from
University of Toronto

鄉黨圖考卷之五

新安江 永慎修著

及門諸子編次

衣服^上

始制衣服考

禮運昔者先王未有麻絲衣其羽皮後聖有作然後治其麻絲以爲布帛。**疏**云治麻絲爲布帛謂五帝時。○**易繫辭傳**黃帝堯舜垂衣裳而天下治蓋取諸乾坤。^{上衣下裳以象乾坤亦象元黃之色}○**世本**胡曹作衣。

黃帝
臣

冕考

世本黃帝作冕

註冕冠之有旒者也

○大戴禮冕而前旒所以蔽明

通典云示不邪

視黻纁塞耳

黻黃色纁緇也塞耳懸於兩旁

所以揜聰

通典云示不聽讒也東方朔云蔽明塞聰明有所不

見聰有所不聞舉大德赦小過無求備於一人之義也

○左傳衮冕黻珽

疏云論語麻冕禮

也蓋以木爲幹而用布衣之上元下朱取天地之色漢禮器制度

云冕制皆長尺六寸廣八寸謂之冕者冕俛也以其後高前下有

俛俯之形故因名焉蓋以在上位者失於驕矜欲令位彌高而志

彌下故制此服令貴者下賤也○傳又云衡紕紘紕疏云冕以木

爲幹以元布衣其上謂之緼。玉藻弁師俱作延。論語尙書皆云麻冕知其

當用布也。弁師五冕皆元冕知其色用元也。孔安國論語註言績

麻三十升布以爲冕卽是緼也。○論語麻冕禮也。孔注冕緼布冠也。績麻三十升布以爲之。疏鄭註喪服布八十縷爲升。

按冕者冠之有延有旒孔以緼布冠解之與始冠之緼布

冠相混又謂績麻三十升布爲之亦非也。古布幅闊二尺

二寸當今尺一尺三寸七分半若容三十升之縷二千四

百則今尺一分之地幾容一十八縷此必不能爲者也。孔

意蓋謂古者朝服十五升冠當倍於衣不知冠升倍衣唯

喪服斬衰三升冠六升則然。自齊衰以下則非倍半之數矣。禮無冠倍於衣之例。孔誤釋耳。麻冕之布亦不過十五升。如今尺之一分容九縷已是細密難成矣。

周禮夏官弁師掌王之五冕皆元冕朱裏延紐。注冕服有六而言五冕者大裘之冕蓋無旒不聯數也。延冕之覆在上者是以名焉。紐小鼻柱武上笄所貫也。今時冠卷當簪者廣裘以冠縫其舊象與疏延卽是上元者紐綴於冕兩旁垂之武兩旁作孔以笄貫之冠卷爲武以笄入紐及孔貫纚與髮使得其牢固也。凡冕體周禮無文叔孫通作漢禮器制度取法於周今還取彼以釋之按彼文凡冕以版廣八寸

長尺六寸以上元下朱覆之乃以五采纁繩貫五采玉垂於延前
后謂之邃延又云弁師所掌冕以旒爲主祭天用大裘取質其冕
亦當無旒爲質故此不數之爵弁前後平則得弁稱冕則前低一
寸餘得冕名冕則俛也以低爲號也○又五采纁十有二就皆五
采玉十有二玉笄朱紘注纁雜文之名也纁古字藻今字合五采絲爲之

繩垂於延之前后各十二所謂邃延也就成也繩之每一帀而貫
五采玉十二旂則十二玉也每就間蓋一寸朱紘以朱組爲紘也
紘一條屬兩端於武纁不言皆有**不皆者**此爲衮衣之冕十二旂
則用玉二百八十八鷩衣之冕纁九旂用玉二百一十六毳衣之

冕七旒、用玉百六十八。希衣之冕五旒、用玉百二十。元衣之冕三旒、用玉七十二。〔疏〕言玉采纁十有二者、此據衮冕而言、謂合五采絲爲藻、繩十二道爲十二旒也。皆五采玉十有二者、此各據一旒而言。玉有五色、以青赤黃白黑於一旒之上、以此五色玉貫於藻繩之上、每玉間相去一寸、十二玉則十二寸、就成也。以一玉爲一成、結之使不相并也。云紃一條、屬兩端於武者、謂以一條繩、先屬一頭於左旁筓上、以一頭繞於頤下、至向上於右相筓上繞之、是以鄭注士冠禮云、有筓者屈組以爲紃、垂爲飾。兩頭皆有垂餘彼據皮弁尊弁、此五冕皆有筓、與彼同、此言屬於武者、據筓貫武、故以武言。

之其實在筭。王之五冕。纁則有十二。有九。有五。有三。其玉旒皆十二。故纁不言皆有。不皆者。則九旒以下是也。玉言皆。則五冕旒皆十二玉也。

按大戴禮及東方朔答客難。皆云冕而前旒。所以蔽明。則無後旒。可知後旒何所取義乎。鄭謂前後皆有旒。此因玉藻前後邃延而誤耳。前後邃延。謂版長尺六寸。自延端至武。前後皆深邃。非謂後亦有旒也。玉藻言十有二旒。未嘗言前後皆十有二旒也。據疏引漢禮器制度。亦云垂於延之前後。豈叔孫通失之與。抑所引者非禮器制度之原文。

與且袞冕二十四旒用玉二百八十八如此繁重恐首不能勝夫子論爲邦何爲取於周冕乎鄭所計用玉每冕皆當去其半。

又諸侯之纁旒九就璿玉三采其餘如王之事纁旒皆就玉璿玉

笄注侯當爲公字之誤也三采朱白蒼也

諸侯三采損元黃不敢用天地之色也冕延上

元下朱亦是法天地者朱色近黃也冕尊卑皆用元冕朱裏禮有損之而益亦所謂經而等也其餘謂延紐皆元

覆朱裏與王同也出此則異纁旒皆就皆三采也每纁九成則九

旒也公之冕用玉百六十二璜塞耳者

黃帝用黼纁後王又易之以玉

疏王與諸

侯互見爲義是以王言元冕朱裏延紐及朱紘明諸侯亦有之諸

公言玉璜明王亦有之鄭知侯當爲公者以下別見諸侯又九就當上公以九爲節故知是公也○又諸侯及孤卿大夫之冕各以其等爲之而掌其禁令注各以其等纁旂以其命數也侯伯纁七就用玉九十八子男纁五就用玉五十纁玉皆三采孤纁四就用玉三十二三命之卿纁三就用玉十八再命之大夫纁再就用玉八纁玉皆朱綠一命之大夫冕而無旒士變冕爲爵弁疏云孤卿大夫文承諸侯之下故鄭以諸侯之孤卿大夫解之不別見天子之臣文中可以兼之云各以其等爲之不言爵而言等則依命數矣一命之大夫冕而無旒鄭知然者凡冕旒所以爲文飾一命若

有則止一旒一玉而已。非華美。又見一命大夫衣無章。士又避之。變冕爲爵弁。若一命大夫有旒。士則不須變冕爲爵弁。直服無旒之冕矣。故知一命大夫無旒也。

孔子爲司寇。是一命大夫。去魯不脫冕而行。此冕是無旒之冕。衣無

文。裳刺黻而已。魯人之歌言衮衣章甫。爰得我者。借尊者之冕服言之。其實非龍衮之衣也。若然。爵弁制如冕。

但無旒爲異。則無旒之冕亦與爵弁不殊。得謂之冕者。但無旒之

冕亦前低一寸餘。故亦得冕名也。○**玉藻**天子玉藻十有二旒。前

後遽延。**注**天子以五采藻爲旒。旒十有二。前後遽延者。言皆出冕

前後而垂也。

冕版長。前後距武深遽。非以前後旒垂爲遽。後無旒前已辯明。

天子齊肩延。冕上覆

也。元表纁裏。**疏**天子之旒十有二就。每一就貫以玉。就間相去一

寸則旒長尺二寸

古尺尺二寸當今尺七寸五分

天子齊肩則諸侯以下各有差

降九玉者九寸七玉者七寸以下皆依旒數垂而長短爲差旒垂

五采玉依飾射侯之次從上而下初以朱次白次蒼次黃次元

五行

相克之次

五采玉既貫徧周而復始三采者先朱次白次蒼二色者先

朱後綠至漢明帝時用曹褒之說皆用白旒珠與古異也云元表

朱裏者纁是朱之小別

赤黃之間

周禮鍾氏三入爲纁鄭注士冠禮朱

則四入與是纁朱同類故注弁師朱裏與此不異○**禮器**禮有以

文爲貴者天子之冕朱綠藻十有二旒諸侯九上大夫七下大夫

五士三

注朱綠似夏殷禮也周禮天子五采藻

疏天子之冕朱綠

藻十有二旒者、亦是夏殷也、諸侯九、上大夫七、下大夫五、士三、亦言夏殷也、周家旒數隨命數、又士但爵弁無旒也、

按記者雜記異代之冕制、天子用朱綠二采、太卑矣、諸侯有五等、一用九旒、太無別矣、七旒五旒、用之上大夫下大夫、則已僭、士得服三旒之冕、亦太尊、以此觀之、可知周冕之善、夫子所以取之、

左傳衡紃紃、注衡維持冠者、紃冠之垂者、疏王后之衡以玉爲之、故追師掌焉、弁師掌王之五冕、弁及冕皆用玉筭、則天子之衡亦用玉、衡卽筭也、諸侯以下、衡之所用則未聞、紃者、縣瑱之繩、垂於冠

之兩旁。魯語敬姜曰。王后親織元紃。則紃必織線爲之。若今之條繩。鄭詩箋云。充耳。謂所以縣瑱者。或名爲紃。織之人。君五色。臣則三色是也。條必雜色。而魯語獨言元者。以元是天色。故特言之。非謂純元色也。紃用一組。從下屈而上屬之於兩旁。縣其餘也。士冠禮言組紃。知天子諸侯之紃亦用組也。○祭義。天子冕而朱紃。諸侯冕而青紃。

冕服考

書益稷。帝曰。予欲觀古人之象。日月星辰。山龍華蟲。作會宗彝藻火。粉米黼黻。絺繡。以五采彰施於五色。作服。汝明。孔傳天子服日

月而下，諸侯自龍袞而下，至黼黻士服藻火，大夫加粉米，上得兼下，下不得僭上。孔疏云：左傳言三辰旂旗，周禮司常云日月爲常，王者禮有沿革，後因於前，故知舜時三辰亦畫之於旂旗。下傳云天子服日月而下，則三辰畫之於衣服，又畫於旂旗也。周禮司服云：享先王則袞冕，袞者卷也，言龍首卷然以袞爲名，則所畫曰龍以下無日月星也。郊特牲云：祭之日，王被袞以象天。據此記文，袞冕之服亦畫日月。鄭言郊特牲所云謂魯禮，要其文稱王被服袞冕，非魯事也。或當二代天子衣上亦畫三辰，自龍章爲首而使袞統名耳。蔡氏書傳云：上衣下裳之制，創自黃帝而成於堯舜。日月星辰取其照臨，山取其鎮，龍取其變，華蟲取其文，會繪也。

宗彝虎雖取其孝藻水草取其潔火取其明粉米白米取其養黼
若斧形取其斷黻爲兩已相背取其辨絺鄭氏讀爲黼絜也絜以
爲繡也日月星辰山龍華蟲六者繪之於衣宗彝藻火粉米黼黻
六者繡之於裳繪繡皆雜施五采以爲五色也又按王制孔疏云
宗彝謂宗廟彝尊之飾有虎雖二獸虎有猛雖能辟害故象之不
言虎雖而謂之宗彝者取其美名周禮有六彝知必爲虎雖者周
禮陳六尊六彝皆遠代者在後六尊之次火是虞氏之尊山是夏
后之尊六彝之次亦虎彝雖彝在後故知虎雖虞夏已飾於尊舜
時已稱宗彝以周禮差之而鄭注云自日月至黼黻凡十二章天
當毳冕知虎雖有毛之物也

子以飾祭服衣用繪裳用繡至周而變之以三辰爲旂旗謂龍爲
袞宗彝爲毳或損益上下更其等差○王制疏云皋陶謨五服五
章哉鄭注云五服十二也九也七也五也三也如鄭之意九者謂
諸侯之服自山而下七也是伯之服自華蟲而下五也謂子男之

服自藻而下三也。卿大夫之服自粉米而下。以上所云虞舜之制而夏殷註云未聞。○周禮春官司服王之吉服祀昊天上帝則服大裘而冕。祀五帝亦如之。享先王則袞冕。享先公饗射則鷩冕。祀四望山川則毳冕。祭社稷五祀則希冕。祭羣小祀則元冕。注古天子冕服十二章。舜欲觀焉。華蟲五色之蟲。希讀爲絺。或作黼。王者相變。至周而以日月星辰畫於旌旗。所謂三辰旂旗。昭其明也。而冕服九章。登龍於山。登火於宗彝。尊其神明也。九章初一日龍。次二曰山。次三曰華蟲。次四曰火。次五曰宗彝。皆畫以爲績。次六曰藻。次七曰粉米。次八曰黼。次九曰黻。皆希以爲繡。則袞之衣五章。

裳四章凡九也。驚畫以雉，謂華蟲也。其衣三章，裳四章凡七也。毳畫虎，謂宗彝也。其衣三章，裳二章凡五也。希刺粉米，無畫也。其衣一章，裳二章凡三也。元者，衣無文，裳刺黻而已。是以謂元焉。凡冕服皆元衣纁裳。疏：古人必爲日月星辰於衣者，取其明也。山取其人所仰，龍取其能變化，華蟲取其文理。衣是陽，畫亦輕浮，故衣纁也。宗彝者，據周之彝尊，有虎彝雉彝，因於前代，則虞時有虎彝雉彝可知。宗彝非蟲獸之號，而言宗彝者，以虎雉畫於宗彝，則因號虎雉爲宗彝，其實是虎雉也。虎雉同在於彝，故此亦并爲一章也。虎取其嚴猛，雉取其有智。爾雅註：雉似獼猴而大，黃黑色，尾長數尺，尾末有岐，鼻露向上，兩則自懸。

於樹以尾塞鼻或以兩指

藻亦取其有文火亦取其明粉米共爲一章取其潔

亦取養人黼謂白黑爲形則斧文近刃白近上黑取斷割焉黻黑

與青爲形則兩已相背取臣民背惡向善亦取君臣有合離之義

去就之理也裳主陰刺亦是沉深之義故裳刺也知登龍於山者

周法皆以蟲獸爲章首若不登龍於山則當以山爲章首何得猶

名袞龍乎明知登龍於山取其神也又知登火於宗彝者宗彝則

毳也若不登火在宗彝上則毳是六章之首不得以毳爲五章之

首故知登火於宗彝取其明也

王制疏云宗彝之下有藻火二章火光明貴於藻故知登火不登藻

云九章初一日龍至凡五此無正文竝鄭以意解之以其衣是陽

從奇數。裳是陰。從偶數。云希刺粉米無畫者。粉米不可畫之物。今雖在衣亦刺之不變。故得希名。然則毳冕之粉米亦刺之也。祭服衣本是元。今元冕一章。仍以元爲名。明衣上無畫一章者。刺黻於裳而已。知凡冕服皆元衣纁裳者。見易言黃帝堯舜垂衣裳。蓋取諸乾坤。天色元。地色黃。但土無正位。託於南方。火赤色。赤與黃卽是纁色。故以纁爲名也。

按三代制禮。有益亦有損。天子用物。雖得備十二。然冕戴於首。既有十二旒。十二玉。以則天數。冕服之章。以九爲尊。取陽數之極。禮尙相變也。古用十二章。周損爲九章。日月

星唯畫於大常。正是監前代損益之精意。倘有益無損。則制度彌文。伊於胡底乎。鄭說俱允當。有謂周冕服亦用十二章者。非也。

又公之服。自衮冕而下。如王之服。侯伯之服。自鷩冕而下。如公之服。子男之服。自毳冕而下。如侯伯之服。孤之服。自希冕而下。如子男之服。卿大夫之服。自元冕而下。如孤之服。注自公之衮冕。至卿大夫之元冕。皆其朝聘天子及助祭之服。諸侯非二王後。其餘皆元冕而祭於已。疏上具列天子之服。此文以上公自衮冕以下。差次之。上得兼下。下不得僭上也。此上公衮以下。既非自相聘之服。

又非已之祭服。案曾子問云：諸侯裨冕出視朝。鄭云：爲將廟受。謂朝天子時也。及助祭在廟，理當裨冕。若卿大夫聘天子，受之在廟，及助祭亦申冕服可知。玉藻云：諸侯元端以祭。注云：端當爲冕。是諸侯元冕自祭於已也。玉藻注云：諸侯祭宗廟之服，唯魯與天子同。此注云：諸侯非二王後，其餘皆元冕祭於已。彼不言二王後，此不言魯者，彼此各舉一邊而言，其實相兼乃具也。魯雖得與天子同，唯在周公文王廟中得用衮冕。若餘廟亦元冕，或可依公羊傳：魯公與羣公別牲而用駢剛，則其服宜用鷩冕可也。其二王後唯祭受命王得用衮冕，其餘廟亦用元冕也。○玉藻：天子玉藻十有

二旒前後邃延龍卷以祭元端而朝日於東門之外注龍卷畫龍

於衣字或作袞端當爲冕字之誤也元衣而冕冕服之下疏諸侯

皮弁聽朔朝服視朝今天子皮弁視朝若元端聽朔則聽朔之服

卑於視朝且聽朔大視朝小故知端當爲冕又諸侯元端以祭

裨冕以朝注祭祭先君也祭外神亦元冕端亦當爲冕字之誤也諸侯祭

宗廟之服唯魯與天子同朝朝天子也裨冕公袞侯伯鷩子男毳

也疏唯魯與天子同者明堂位云君卷冕立於阼夫人副褱立於

房中是也此謂祭文王周公之廟得用天子之禮其祭魯公以下

則亦元冕王制疏云公之袞冕數與王同其旒數則異故鄭註

覲禮云、上公衮無升龍、其旒則九、不十二也、其三公司服無文、按射人三公執璧、與子男同、則服毳冕也、有孤之國、其孤絺冕、卿大夫元冕、士爵弁、無孤之國、卿絺冕、大夫元冕、以鄭註玉藻云、諸侯之臣、皆分爲三等也、○禮器禮有以文爲貴者、天子龍衮、諸侯黼、大夫黻、士元衣纁裳、疏人君因天之文章以表德、德多則文備、故天子龍衮、諸侯以下、文稍少也、然周禮上公亦衮、侯伯鷩、子男毳、孤卿絺、大夫元、士爵弁、元衣纁裳、今言諸侯黼、大夫黻、雜明夏殷禮也、但夏殷衣有日月星辰、今云龍衮者、舉多文爲首耳、○左傳火龍黼黻、昭其文也、注火畫火也、龍畫龍也、白與黑謂之黼、形若

斧、黑與青謂之黻，兩已相戾。〔疏〕周衮冕九章，傳唯言四章，畧以明義，故文不具舉。衣畫龍先於火，今火先於龍，知其言不以次也。○
〔覲禮〕侯氏裨冕，釋幣於禰。〔注〕裨冕者，衣裨衣而冠冕也。裨之爲言卑也。天子六服，大裘爲上，其餘爲裨，以事尊卑服之。而諸侯亦服焉。上公衮無升龍，侯伯鷩子男毳孤絺，卿大夫元，此差司服所掌也。〔疏〕裨讀從詩政事一卑益我，取裨陪之義。天子六冕，以大裘爲上，無裨義。衮冕以下，皆爲裨。云上公衮無升龍者，白虎通引禮記曰：天子乘龍載大旗，象日月升龍。傳曰：天子升降，諸侯降龍。以此言之，上得兼下，下不得僭上，則天子升降俱有，諸侯直有降龍而

已若然彼升龍文承大旗之下知不施於旌旗而據衣服者案司
常云交龍爲旂又云諸侯建旂註云諸侯畫交龍一象其升朝一
象其下復則旌旗升降俱有而白虎通云諸侯降龍者據衣服而
言

冕服之韞考

兼考
笏舄

左傳衮冕黻珽注黻韞韞以蔽膝也珽玉笏也疏黻韞制同而名
異鄭詩箋云韞犬古蔽膝之象也冕服謂之韞其他服謂之韞以
韞爲之詩云赤韞在股則韞是當股之衣故云以蔽膝也鄭氏易
緯乾鑿度註云古者田漁而食因衣其皮先知蔽前後知蔽後後

王易之以布帛而獨存其黻前者。重古道而不忘本也。是說黻韠之元由也。明堂位云。有虞氏服韍。言舜始作韍也。尊祭服。異其名耳。未必此時始存象也。凡韠皆是裳色。其黻則有文飾焉。玉藻曰。韠下廣二尺。上廣一尺。長三尺。其頸五寸。肩革帶。博二寸。鄭云。頸五寸。亦謂廣也。頸中央。肩兩角。皆上接革帶以繫之。肩與革帶廣同。是說韠之制也。記傳更無韍制。皆是韠義。明其制與韠同。經傳作黻。或作韍。或作帶。音義同也。

按黻與韍不同。黻是裳上之章。以青與黑之文。繡作兩已相背之形。韍是韋蔽膝。此衮冕黻珽。當作韍。乃與下火龍

黼黻之黻同作黻。蓋轉寫之誤耳。若論語禹致美乎黻冕。左傳晉侯以黻冕命士會。與冕連文。皆當爲黼黻之黻。故鄭注論語云。黻是冕服之衣。冕其冠也。明黻是冕服之章。舉後一章以該他章耳。邢疏既引鄭注。乃解黻爲蔽膝。邢說誤。今集註亦承其誤。

明堂位有虞氏服韍。夏后氏山。殷火。周龍章。注韍冕服之韠也。舜始作之。以尊祭服。禹湯至周。增以畫文。後王彌飾也。山取其仁。可仰也。火取其明也。龍取其變化也。天子備焉。諸侯火而下。卿大夫山。士韍韋而已。疏士冠禮士韍韠。是士無飾。推此則尊者飾多。此

有四等。天子至士亦爲四等。故知卿大夫加山，諸侯加火，天子加龍。○詩朱芾斯皇。鄭箋芾者，天子純朱，諸侯黃朱。疏芾從裳色，祭時服纁裳，故芾用朱赤，但芾所以明尊卑，雖同色而有差降。朱深於赤，對文則朱赤深淺有異，散文則皆謂之朱。○又赤芾在股。箋

前

○玉藻一命緼韍幽衡，再命赤韍幽衡，三命赤韍蔥衡。注此元

冕爵弁服之韍，尊祭服，異其名耳。韍之亦言蔽也。緼，赤黃之間色，所謂韍也。衡，佩玉之衡也。幽，讀爲黝，黑謂之黝。青謂之蔥。疏一命謂公侯伯之士，士冠禮爵弁韍鞅，此緼韍，則當彼韍鞅也。諸侯黃朱色淺，亦名赤韍，則大夫赤韍色又淺耳。○左傳衮冕黻珽。注珽，

玉笏也。疏：天子之笏，以玉爲之。管子云：天子服玉笏以朝，曰是有玉笏之文也。釋名曰：笏，忽也。君有命則書其上，備忽忘也。或曰：笏可以簿疏物也。徐廣車服儀制曰：古者貴賤皆執笏，卽今手板也。按：笏者，古人以爲服飾，常插之於帶間，有事出之，無事仍插之。禮經皆言搢笏，後世謂之簿，又謂之手板，不插而執之，乃有持簿執手板之事。又有垂紳正笏之文，皆非古制。疏中凡言執笏者，皆誤也。今作文當言垂紳搢笏，不得用垂紳正笏。

玉藻：天子搢珽，方正於天下也。注：此亦笏也，謂之珽。珽之言珽然，無所屈也，或謂之大圭，長三尺，杼上終葵首，終葵首者，於杼上又

廣其首方如椎頭。是謂無所屈。後則恆直。○又諸侯荼。前詘後直。讓於天子也。注荼讀爲舒遲之舒。舒懦者所畏在前也。詘謂圜殺其首。不爲椎頭。諸侯唯天子詘焉。是以謂笏爲荼。○又大夫前詘後詘。無所不讓也。注大夫奉君命出入者也。上有天子。下有已君。又殺其下而圜。

按璚與大圭不同。天子冕弁諸服。常搢璚。唯朝日搢大圭。故典瑞特言之。若大圭卽璚。平時皆搢。不必於典瑞見之矣。考工玉人言大圭長三尺。杼上終椎首。謂圭上殺。又別爲椎頭。若璚則無終葵首之制。且玉藻下文言笏度二尺。

有六寸、尊卑皆然、亦不長三尺也。笏插於帶、以上爲前、下爲後、詘者曲也。非圜殺之謂。珽通身皆直、紱則上曲而下直。大夫之笏曲其中、央則上與下皆有彎環之形。後世之笏作曲形、正前詘後詘之謂也。鄭誤以大圭爲珽。并詘字之義亦失之。

管子言天子服玉笏以朝、此玉笏爲大圭。

又笏、天子以球玉、諸侯以象、大夫以魚須、音班文竹、士竹、本象可也。

注、球、美玉也。文、猶飾也。大夫士飾竹以爲笏、不敢與君竝用純物。

也。疏、謂以魚須文飾其竹。前言將適公所、史進象笏、則大夫亦用象。熊氏云、謂有地大夫。○又凡

有指畫於君前用笏、造受命於君前、則書於笏、笏畢用也。因飾焉。

笏度二尺有六寸，其中博三寸，其綬六分而去一。

笏中廣而上下綬尊卑皆同，但

所用物異耳。鄭誤以大圭杼上。

〔詩〕赤芾金舄。

複下曰舄，此冕服之舄也。金者黃朱

終葵首爲天子之珽。注文不錄。

〔詩〕赤芾金舄。履制詳見。

四代祭服之冠考

王制有虞氏皇而祭，夏后氏收而祭，殷人冔而祭，周人冕而祭。〔注〕

皇，冕屬也。畫羽飾焉。凡冕屬其服皆元上纁下有虞氏十二章周

九章。夏殷未聞。○〔疏〕以皇與下冕相對，故爲冕屬。周禮皇邸皇舞。

皆爲鳳皇之字。鳳羽五采，故云畫羽飾之。○〔王冠禮記〕周弁殷冔

夏收。〔注〕弁名出於槃，槃大也。言所以自光大也。冔名出於幬，言所

以自覆飾也。收所以收歛髮也。齊所服而祭也。其制之異未聞。疏弁者古冠之大號。非直含六冕亦兼爵弁於其中。

弁服考

爵弁爲冕之次亦兼考之

士冠禮爵弁服纁裳純衣緇帶韎韐。注此與君祭之服雜記曰士弁而祭於公爵弁者冕之次其色赤而微黑如爵頭然或謂之緹其布三十升。三十升之說非是疏謂取冠倍之義以喪冠爲證前已辯之纁裳淺絳裳凡染絳

一入謂之緇再入謂之緹三入謂之纁朱則四入與純衣絲衣也餘衣皆用布唯冕與爵弁服用絲耳先裳後衣者欲令下近緇明衣與帶同色韎韐緇韐也士緇韐而幽衡合韋爲之士染以茅蒐

因以名焉。鞞之制似鞞，冠弁者不與衣陳而言於上，以冠名服耳。
疏：凡冕以木爲體，長尺六寸，廣八寸，績麻三十升布。上以元，下以纁。前後有旒，爵弁制大同，唯無旒。又爲爵色爲異，又冕者俛也，低前一寸二分，爵弁則前後平，故不得冕名。其尊卑次於冕，以纁入黑則爲紺，以紺入黑則爲緌，是三入赤，再入黑，爵頭赤多黑少，故以爵頭爲喻也。以紺再入黑汁，與爵同，故取釐氏緌色解之。從一染至三染，皆謂之淺絳。爾雅及鍾氏皆無四入之文，經有朱色，故鄭約之。若以纁入黑則爲紺，若以纁入赤則爲朱也。朝服皮弁服元端服，及深衣長衣之等，皆以布爲之。祭統云：王后蠶於北郊，以

供純服爵弁服是冕服之次故知亦用絲也。茹蘆茅蒐一名菁可
以染絳。周公時名菁草爲韎。以此韎染韋合之爲韐。因名韎爲韎
韐也。○〔又〕皮弁筭爵弁筭緇組紃纁邊。〔注〕筭今之簪有筭者屈組
爲紃垂爲飾纁邊組側赤也。○〔詩〕絲衣其紃載弁俅俅。〔傳〕絲衣祭
服也。紃絜鮮貌。俅俅恭順貌。〔箋〕載獨戴也。弁爵弁也。爵弁而祭於
王士服也。〔疏〕雜記云士弁而祭於公士冠禮有爵弁服純衣與此
絲衣相當故知此弁是爵弁士服之以助君祭也。○〔雜記〕大夫冕
而祭於公弁而祭於己士弁而祭於公冠而祭於己。〔注〕弁爵弁也。
冠元冠也。祭於公助君祭也。大夫爵弁而祭於己唯孤耳。○〔又〕士

實禮升服肆制云率釋名
為之禮也爵弁者祿命信云
焉弁也爵弁者常用布用
之帛凡經傳所稱爵弁皆三
布為之也惟祿命孔傳及釋
名爵弁之制係祥通諸家通
爵弁為焉弁其說誤矣

弁而親迎然則士弁而祭於已可也注緣類欲許之也親迎雖亦
已之事攝盛服爾非常也疏大夫謂孤也冕絺冕也少牢上大夫
自祭用元冠此與少牢異故知是孤知非卿者以少牢禮有卿賓
尸明卿亦元冠不爵弁作記之人以已既爵弁親迎則士亦當用
爵弁自祭於已廟記者緣士類欲許之其理不可親迎配偶一時
之極故許其攝盛服祭祀常所供養故須依其班序

按周禮無爵弁王之弔服有素爵弁於弁經服見之士之
爵弁無等故弁師不言司服亦不言爵弁者疏云爵弁之
服唯承天變時及天子哭諸侯乃服之所服非常故列天

子吉服不言之。今以次轉相如，不得輒於士上加爵弁，故以皮弁服爲首也。公襲有爵弁二，則爵弁又爲諸侯始受命之服。

士冠禮記三王其皮弁素積。注：質不變。郊特牲。注：所不易於先代。

○弁師王之皮弁，會五采玉璫，象邸玉笄。注：會，縫中也。璫，讀如綦。

綦，結也。皮弁之縫中，每質結五采玉十二，以爲飾，謂之綦。詩云：會

弁如星。又曰：其弁伊綦是也。邸，下柢也。以象骨爲之。疏：謂於弁內

頂上，以象骨爲邸。○又諸侯及孤卿大夫之韋弁皮弁，各以其等

爲之，而掌其禁令。注：玉璫如其命數。韋弁皮弁，侯伯璫飾七，子男

璚飾五，玉亦三采。孤則璚飾四，三命之卿璚飾三，再命之大夫璚飾二，玉亦二采。一命之大夫及士，韋弁皮弁之會，無結飾。疏：天子與公不言韋弁，此言之，亦是互見之義。○詩：有匪君子，充耳琇瑩。會弁如星。傳：充耳，謂之瑱。琇瑩，美石也。天子玉瑱，諸侯以石，弁皮弁，所以會髮。箋：會，謂之纒中，飾之以玉。纒纒而處，狀似星也。天子之朝服，皮弁以日視朝。疏：其韋弁飾與皮弁同。○又：其帶伊絲，其弁伊騏。箋：騏當作璆，以玉爲之。疏：顧命：士之騏弁，是青黑色。此言諸侯常服，故知騏當作璆。○司服：凡兵事，韋弁服。注：韋弁以韎韋爲弁，又以爲衣裳。春秋傳曰：晉郤至衣韎韋之跗注，是也。今時五

伯緹衣古兵服之遺色。疏韎是舊染謂赤色也。跗謂足跗。注屬也。袴而屬於跗。鄭此注裳亦用韎韋。至雜問志裳用素者從白舄之義。聘禮卿韋弁歸饗餼。注云韋弁韎韋之弁。蓋韎布爲衣而素裳。與此又不同者。彼非兵事入廟不可純如兵服。故疑用韎布爲衣也。言素裳者亦從白屨爲正也。伍伯謂宿衛者之行長。○又眡朝則皮弁服。注視朝視內外朝之事。皮弁之服十五升白布衣。積素以爲裳。○又士之服自皮弁而下如大夫之服。注諸侯之自相朝聘皆皮弁服。此天子日視朝之服。疏皮弁是士助君視朔之服也。天子之士從王。諸侯相朝其服雖無文。聘禮主君待聘者皮弁。明視朝亦服皮弁。

待諸侯朝亦皮弁可知。○玉藻天子皮弁以日視朝遂以食。○又諸侯皮弁以聽朔於大廟。注皮弁下天子也。疏以天子用元冕諸侯用皮弁故云下天子也。○士冠禮皮弁服素積緇帶素鞶。注此與君視朔之服也。皮弁者以白鹿皮爲冠象上古也。績猶辟也以素爲裳辟感其要中皮弁之衣用布亦十五升其色象焉。疏鄉黨說孔子之服云素衣麤裘。鄭云視朔之服視朔時君臣同服也。三皇時以白鹿皮冒覆頭鉤領繞項此象上古謂象三皇時以五帝爲犬古以三皇爲上古也云以素爲裳者經典云素者有三義若以衣裳言素者謂白繒也。亦云白素絹即此文之等是也。此素雖是白繒而衣仍用

布素衣麕裘之素衣恐只是白布
衣亦用白繒則有以帛裏布之嫌
畫續言素者謂白色卽論語繪
事後素之等是也器物無飾亦曰素則檀弓奠以素器之等是也
知皮弁之服亦用十五升布者雜記云朝服十五升此皮弁亦天
子之朝服故亦十五升布也喪服注云祭服朝服辟積無數則祭
服皮弁皆辟積無數餘不云者舉皮弁可知也

冠考

士冠禮記始冠緇布之冠也大古冠布齊則緇之其綏也孔子曰
吾未之聞也冠而敝之可也注大古唐虞以上綏纓飾未之聞大
古質無飾重古始冠冠其齊冠白布冠今之喪冠是也郊特牲注

云大古無飾，非時人綏也。雜記曰：大白，緇布之冠，不綏。大白，即大古白布冠。今喪冠也。齊則緇之者，鬼神尚幽闇也。此重古而冠之耳。三代改制，齊冠不復用也。以白布冠質，以爲喪冠也。疏：緇布冠，孔子時有綏者，故非時人綏之。諸侯則得著綏尊者飾也。冠而敝之，據士以上冠訖不復用。若庶人猶著之，故詩云：彼都人士，臺笠緇撮。是用緇布冠籠其髮，是庶人常用之矣。詩箋云：都人之士以臺皮爲笠，緇布爲冠。儉且節也。大古時吉凶同服白布冠。三代有牟追之等，則以白布冠爲喪冠。

按大古冠布，齊則緇之，言後世之元冠用緇，不用布，故始

冠之緇布冠。旣冠可敝。注疏未明言元冠用繪則可敝之。
義不明當補。

士冠禮。緇布冠。缺項。青組纓。屬於缺。緇纓廣終幅。長六尺。注。缺。讀
如有頰者。弁之頰。緇布冠無笄者。著頰圍髮際。結項中。隅爲四綴。
以固冠也。項中有繩。亦由固頰爲之耳。今未冠笄者。著卷幘。頰象
之所生也。屬猶著。纓。今之幘梁也。終充也。纓一幅長六尺。足以韜
髮而結之矣。無笄者。纓而結其條。疏云。著頰圍髮際者。無正文。約
漢時卷幘亦圍髮際。故知也。隅爲四綴。亦無正文。旣武以下。別有
頰項明於首四隅爲綴。上綴於武。然後頰項得安穩也。項中有繩。

亦無正文。頰之兩頭皆爲繩，別以繩穿繩中結之，然後頰得牢固也。人髮之長者，不過六尺，纏六尺，足以韜髮。旣云韜髮，乃云結之，則韜訖乃爲紒矣。紒結髮也

按頰者弁之貌，不可以此釋缺項。缺當讀如字。放繼公云

冠後亦謂之項。缺項者，別以緇布一條圍冠。圍髮際而綴於武非圍冠

而後不合，故名缺項。謂其當冠項之處。當人項則缺也。此說

是。後旣不合，宜有繩結之，乃得固。敖氏謂結之以固冠則

非。敖氏又謂大古始爲冠之時，其制如此。此說亦是。著緇

布冠有缺項，存古也。若元冠則不用缺項，而纓屬於武矣。

是以內則不言缺項。又疑注隅爲四縚之說未必然。固冠自有纓。不藉缺項而固。則冠武與缺項。不必連綴。是以元冠無缺項亦固也。纓卽內則之縚。古人不露髮。必韜而結之。繞爲髻。乃著冠。冠無笄而安髻有笄。

又委貌周道也。章甫殷道也。毋追

音牟堆

夏后氏之道也。注或謂委

貌爲元冠。委猶安也。言所以安正容貌。章明也。殷質言以表明丈夫也。甫或爲父。毋發聲也。追猶堆也。夏后氏質。以其形名之。三冠皆所常服以行道也。其制之異同未之聞。疏三代皆言道。是諸侯朝服之冠。在朝以行道德者也。

按雜記言委武元編傳言太伯端委以治周禮又云弁冕端委以治民又晏平仲端委立於虎門則委貌亦單言委公西華言端章甫猶云端委未必有取於殷冠孔子言少居魯衣逢掖之衣長居宋冠章甫之冠似章甫與委貌亦有微異魯人歌衮衣章甫爰得我所又似當時章甫與委貌亦通行可通稱未必夫子以殷人常服章甫也

檀弓古者冠縮縫今也衡縫故喪冠之反吉非古也注今冠橫縫以其辟積多解時人之惑喪冠縮縫古冠耳疏殷以上質吉凶冠皆直縫直縫者辟褊少故一一前後直縫之周世文冠多辟積不

復一一直縫，但多作禡而并橫縫之。周吉冠文，故多辟積而橫縫。若喪冠質猶疏辟積而直縫，是喪冠與吉冠相反，而時人因謂古時亦喪冠與吉冠反，故記者釋云非古也。正是周世如此耳。古則吉凶冠皆從縫。

按今時之喪冠與古吉冠畧相似，冠以梁得名，冠圈謂之武，梁屬於武，但古喪冠用繩爲武，今用布爲武耳。古吉冠以黑繒爲梁，亦以黑繒爲武，梁之廣無正文，喪冠廣二寸，見喪服篇賈疏，則吉冠當亦如之。非若後世之帽，盡舉頭而蒙之也。吉冠之異於喪冠者，吉用繒而喪用麻布也。吉

冠之武用緇而喪冠之武以繩也。吉冠之梁兩頭皆在武上從外向內反屈而縫之不見其畢。喪冠外畢前後兩頭皆在武下自外出反屈而縫之見其畢謂之厭冠也。吉冠纓武異材喪冠纓武同材也。喪冠三辟積於二寸之梁上縮縫之大功以上右縫小功以下左縫殷以上吉冠亦三辟積向左縫周始變爲橫縫辟積無數冠形穹隆當長尺有數寸橫縫可十餘辟積此章須識古之冠制乃知縮縫橫縫之解後儒旣不知古冠用緇則緇布冠何以旣冠而可敝又謂一幅之材順經而辟積則少順緯而辟積則多

又謂一幅布爲冠頂，窄於武，故於其上爲辟積，使上狹下寬，皆由不識古冠之廣止二寸，非用一幅之材，舉頭而蒙之也。其失亦有所由來。聶崇義三禮圖喪冠廣三寸，已非古制矣。秦始皇自謂以水德王，改冠六寸。見史記本紀於是冠梁始闊，至漢又增爲七寸。故漢輿服志云：委貌冠皮弁，同制，長七寸，高四寸，制如覆杯，前高廣，後卑銳。此以委貌同皮弁，如後世之帽。於是古制盡失，猶賴有喪冠存古制之彷彿，今人鮮有能考究者矣。

雜記：大白冠，緇布之冠，皆不麤。委武元縞而後麤。注：不麤，質無飾。

也。大白冠，犬古之布冠也。委武冠，卷也。秦人曰委，齊人曰武。元冠，元冠也。縞縞冠也。疏：元縞二冠，既有先別卷後乃可韡，故云而後韡也。大祥縞冠亦有韡，何以知之？前既云練冠亦條屬右縫，則知縞不條屬，既別安卷灼然有韡也。

按委委貌也。武冠卷也。委貌之制，以冠委於武，故云委武。非謂武有二名也。委貌卽元冠。下又云元者，委武之制，有元有縞，故以委武總於上，下分元縞二冠也。韡所以爲飾。大白緇布之冠皆用布，故有纓無韡。元冠用黑緇，縞冠用生絹，故垂韡爲飾，非謂別安冠卷之故也。鄭注本明，疏不

善隅反。徒求之別。安冠卷。則大白緇布冠。何嘗不別安冠卷乎。後人不識元冠與緇布冠之別。由疏失之。

玉藻始冠緇布冠。自諸侯下達。冠而敝之可也。[注]本大古耳。非時王之法服也。○[又]元冠朱組纓。天子之冠也。緇布冠纁纁。諸侯之冠也。[注]皆始冠之冠也。元冠委貌也。諸侯緇布冠有纁。尊者飾也。纁或作繪。纁或作𦃟。[疏]諸侯唯纁纁爲異。其頰項青組纓等。皆與士同。○[又]元冠丹組纓。諸侯之齊冠也。元冠綦組纓。綦雜色也士之齊冠也。[注]言齊時所服也。四命以上。齊祭異冠。[疏]諸侯元冕祭。元冠齊。孤則爵弁祭。亦元冠齊。是齊祭異冠也。三命以下大夫。則朝服

以祭士則元端以祭皆元冠也。此云元冠綦組纓士之齊冠是齊祭同冠也。天子大夫與諸侯孤同亦爵弁祭元冠齊。○又緇冠元武子姓之冠也。注謂父有喪服子爲之不純吉也。武冠卷也。古者冠卷殊。疏姓生也。孫是子所生故云子姓。元吉緇凶吉而雜凶故云不純吉也。卷用元而冠用緇冠卷異色故云古者冠卷殊如鄭此言則漢時冠卷共材。

按注言古者冠卷殊謂冠與卷不相連至著冠時始合之。對下文居冠屬武耳。疏以冠卷異色解之誤矣。冠卷異色唯此緇冠元武與元冠緇武二冠耳。非此二冠則元冠元

武。縞冠。縞武。不異色也。注冠卷殊之說亦非是。說見下。

又縞冠素紕。既祥之冠也。注紕緣邊也。既祥之冠。已祥祭而服之。

○又垂綏五寸。惰游之士也。注惰游罷民也。亦縞冠素紕。凶服之

象也。垂長綏。明非既祥。○又元冠縞武。不齒之服也。注所放不帥

教者。○又居冠屬武。自天子下達。有事然後綏。注謂燕居冠也。著

冠於武。少威儀。燕無事者去飾。疏燕居之冠。冠武相連屬。燕居率

略少威儀。又不加綏。若非燕居。則冠與武別。臨著乃合之。有儀飾

故也。

按冠必與武先縫合乃可著。且行禮者必先衣冠。不於行

禮時始著冠。何必以臨時著冠於武爲多威儀耶。又吉冠內畢。如冠不屬武。則內畢之冠未易連合。倘連合不固。行禮而冠脫。大失威儀。古人當不如是迂拙也。詳此經之意。居冠屬武。對下有事然後綏而言。謂燕居之冠。但以纓結於頷下。使冠與首相著而已。更不用垂綏屬武。是結纓而武連於首。非謂冠梁屬於武也。

又大帛不綏。注帛當爲白。大帛謂白布冠也。不綏。凶服去飾。疏左傳衛文公大布之衣。大帛之冠。白繒冠也。與大布相對。與此異也。
○又元冠紫綏。自魯桓公始也。注蓋僭宋王者之後服也。綏當用

續

按王者之後未見用紫之事蓋當時尙紫之漸耳

朝服考

司服凡甸冠弁服注甸田獵也冠弁委貌其服緇布衣亦積素以爲裳諸侯以爲視朝之服詩國風曰緇衣之宜兮謂王服此以田
疏凡甸冠弁服據習兵之時若正田時則當戎服左傳衛獻公不
釋皮冠皮弁韋弁同但色異耳是正田用韋弁也○玉藻諸侯朝
服以日視朝於內朝注朝服冠元端素裳也此內朝路寢門外之
正朝也疏王制云周人元衣而養老註云元衣素裳天子之燕服

燕飲羣臣之服亦即田獵之冠弁服爲諸侯朝服。彼註云元衣則此元端也。若以素

爲裳即是朝服。此朝服素裳皆得謂之元端。故論語端章甫註云

端元端諸侯朝服。若上士元裳中士黃裳下士雜裳。天子諸侯以

朱爲裳則皆謂之元端不得名爲朝服也。○又又朝服以食注食

必復朝服所以敬養身也。疏謂釋服之後將食之時又如朝時朝

服。○士冠禮筮於廟門主人元冠朝服緇帶素鞶注元冠委貌也

朝服者十五升布衣而素裳也衣不言色者衣與冠同也。緇帶黑

繒帶也。士帶博二寸再繚四寸屈垂三尺素鞶白韋鞶也長三尺

上廣一尺下廣二尺其頸五寸肩革帶博二寸天子與其臣元冕

以視朔皮弁以日視朝諸侯與其臣皮弁以視朔朝服以日視朝

疏云素裳者雖經不言裳裳與韠同色云素韠故知裳亦積白素

絹爲之也

積者辟積也與皮弁服素積同

禮之通例衣與冠同色裳與韠同色玉

藻聽朔視朝彼皆不言臣此兼言臣者欲見在朝君臣同服○維

記朝服十五升

古未有棉花布以麻爲之布幅闊二尺二寸十五升一千二百縷麻布之極細者也

○玉藻

非列采不入公門

注列采正服

○又朝服之以縞也自季康子始

也注亦僭宋王者之後疏王制云殷人縞衣而養老燕服則爲朝

服宋是殷後故朝服以縞

縞生絹也

○又孔子曰朝服而朝卒朔然後

服之注謂與諸侯羣臣也諸侯視朔皮弁服疏卒朔謂卒告朔之

時服皮弁告朔禮終脫去皮弁服而後服朝服也

兼考元端服

義禮箋云元端三
義王論列其服非
者以所服人上經
服種裳皮弁服
服清亦通服元端
元端者第祗裳以
小者乃士服

士冠禮元端元裳黃裳雜裳可也緇帶爵韠注此暮夕於朝之服
元端卽朝服之衣易其裳耳上士元裳中士黃裳下士雜裳雜裳
者前元後黃易曰夫元黃者天地之雜也天元而地黃士皆爵韠
爲韠其爵同不以元冠名服者是爲緇布冠陳之疏玉藻朝元端
夕深衣是大夫士家私朝此服是向暮時夕君之服朝禮備夕禮
簡故以夕言之若卿大夫暮夕於君當亦朝服矣左傳云百官承
事朝而不夕此云暮夕者無事亦無夕法若夕有事須見君則夕

故傳云子革夕子我夕皆是有事見君非常朝夕之事也。夕見君當是路

寢之朝服亦得名端。皆以十五升布爲緇色正幅爲之同名也。雜

裳前陽後陰故知前元後黃三等士各有所當當者卽服之故言可以許之。

按鄭言不以元冠名服者是爲緇布冠陳之非也。朝服元端及深衣皆用元冠。雖不爲緇布冠陳亦不可以元冠名服。

司服士之服自皮弁而下如大夫之服其齊服有元端素端。[注]端者取其正也。士之衣袂皆二尺二寸而屬幅是廣袤等也。其袷尺

二寸大夫已上侈之侈之者蓋半而益一半而益一則其袂三尺
三寸袼尺八寸疏衣袂二尺二寸喪服記文彼注云此謂袂中也
言衣者明與身參齊是元端之身長二尺二寸今兩邊袂亦各屬
一幅幅長二尺二寸上下亦廣二尺二寸故云廣袂等袂則長也
布幅二尺二寸每幅兩邊各
去一寸爲縫其實得二尺也其袼尺二寸據玉藻深衣之袼尺二
寸而言也雜記云凡弁經其袂侈袂少牢主婦衣綃衣亦云侈袂
侈大也鄭卽以意爲半而益一以解之也○玉藻天子卒食元端
而居注服元端燕居○又韠君朱大夫素士爵韠注此元端服之
韠也韠之言蔽也凡韠以韋爲之必象裳色則天子諸侯元端朱

裳。大夫素裳，唯士元裳黃裳雜裳也。疏：大夫元端以素爲裳，故素
韠。大夫旣以素裳爲朝服，又以爲元端服，禮窮則同故也。

帷裳考

論語：非帷裳，必殺之。注：王肅曰：衣必有殺縫，唯帷裳無殺也。疏：謂
朝祭之服，上衣必有殺縫，其餘服之裳則亦有殺縫，故深衣之制，
要在縫半，下齊倍要，喪服之制，裳內削幅。注云：削猶殺也。

按帷裳對深衣及長衣中衣之裳言之。深衣等裳無辟積，
其當旁之衽，須斜裁，謂之殺。朝服祭服喪服皆用帷裳，有
辟積則前三幅，後四幅，皆以正裁，有辟積故無殺。王注乃

對上衣言之誤矣。衣身與袂俱以二尺二寸之正幅各去邊二寸縫之。安得有殺。疏既知舉深衣裳有殺矣。仍曲徇王說。又舉喪服之裳內削幅者爲殺。誤甚。喪服正是帷裳。其云內削幅者。謂布幅二尺二寸。縫時各削一寸。向內縫之。不若衰衣向外縫耳。與此殺字義異。此殺謂斜裁。彼削謂摺倒一寸。注雖以殺訓削。義實不同。集註不用舊說。須參合深衣考之。

鄭注喪服云。祭服朝服。辟積無數。凡裳前三幅後四幅。疏朝服謂諸侯與其臣以元冠服爲朝服。天子與其臣以皮弁服爲朝服。祭

服者衮冕與爵弁爲祭服。不云元端，亦是士家祭服中兼之。凡服唯深衣長衣之等，六幅破爲十二幅，狹頭向上。謂裳兩旁之袷不須辟積，其餘要間已外，皆辟積無數，不似喪服三辟積有數也。喪服之裳云謂辟兩側空中央也。疏云衤是屈中之稱。一幅凡三處屈之，辟兩邊相著，自然中央空矣。幅別皆然也。前爲陽，後爲陰，故前三後四，各象陰陽也。唯深衣之等，連衣裳十二幅，以象十二月也。

按帷裳之制，經無考。因喪服注可見，皆用七幅。前三後四，與袞裳同。辟積無數，與袞裳異。

玉藻：衣正色，裳間色。注：謂冕服元上纁下。疏：纁是地色，赤黃之雜。

故爲間色。○顧命王麻冕黼裳，卿士邦君麻冕蟬裳，太保太史太
宗皆麻冕。形徒冬反裳傳王及羣臣皆吉服。蟬裳名，色元，形纁也。疏
衮之衣五章，裳四章，則衮衣之裳非獨有黼，言黼裳者以裳之章
色黼黻有文，故特取爲文。詩言王賜諸侯元衮及黼，以黼有文，故
特言之。蟬裳以色元如蟬，故以蟬名之。禮祭服皆纁裳，此獨云元
裳者，卿士邦君於此無事，不可全與祭同，改其裳以示變於常也。
形赤也，纁是赤色之淺者，故以形爲纁。

鄉黨圖考卷之六

新安江 永慎修著

及門諸子編次

衣服 下

深衣考

兼考長衣中衣

禮記深衣篇鄭氏目錄云名曰深衣者以其記深衣之制也深衣連衣裳而純之以采者素純曰長衣有表則謂之中衣大夫以上祭服之中衣用素詩云素衣朱襮玉藻曰以帛裏布非禮也士祭

以朝服中衣以布明矣。**疏**餘服上衣下裳不相連此深衣衣裳相連被體深邃故謂之深衣其長衣中衣及深衣其制度同玉藻云長中繼揜尺若深衣則緣而已凡深衣皆用諸侯大夫士夕時所著之服庶人吉服亦深衣皆著之在表也其中衣在朝服祭服喪服之下。謂在內。但喪服中衣不得繼揜尺其吉服中衣亦以采緣諸

侯得綃黼爲領丹朱爲緣大夫士但用采緣而已其長衣以素緣

○**深衣**古者深衣蓋有制度以應規矩繩權衡。**注**言聖人制事必

有法度。**疏**以作記之人爲記之時深衣無復制度故稱古者。○**又**

短毋見膚。**注**衣取蔽形。○**又**長毋被土。**注**爲汙辱也。○**又**續衽鉤

邊。注續猶屬也。衽在裳旁者也。屬連之不殊裳前後也。鉤邊若今曲裾也。疏凡深衣之裳十二幅皆寬頭在下，狹頭在上，皆似小要之衽。是前後左右皆有衽也。今云衽當旁者，謂所續之衽當身之一旁，非謂餘衽悉當旁也。若喪服裳前三幅後四幅各自爲之，不相連。今深衣裳一旁則連之相著，一旁則有曲裾掩之，與相連無異。故云屬連之不殊裳前後也。鄭以後漢時裳有曲裾，故以續衽鉤邊似漢時曲裾，是今朝服之曲裾也。

按注衽在裳旁，本玉藻不誤。疏說非是。辯見後。疏分續衽鉤邊在兩旁，最是一旁連之相著者，左旁也。一旁有曲裾。

掩之者右旁也。但云與相連無異，則非注意。鄭謂屬連之，不殊裳前後，惟言左旁耳。鉤邊似漢時曲裾，當別用一幅布爲之，上狹下闊，綴於右後內衽，使其鉤曲而前，以掩裳際也。若無鉤邊，則行步時露其後衽之裏，故須鉤邊掩之。家禮以合縫爲續衽，覆縫爲鉤邊，非是。

[又]要縫半下。[注]三分要中減一以益下，下宜寬也。[疏]謂要中之縫，半下畔之闊，下畔一丈四尺四寸，則要縫半之，七尺二寸，下容舉足而行，故宜寬。○[又]格之高下，可以運肘。[注]肘不能不出入，格衣袂當掖之縫也。[疏]格謂當臂之處，袂中高下宜稍寬，可以運動其

肘袂二尺二寸。肘尺二寸。是云運肘也。○〔又〕袂之長短。反詘之及肘。〔注〕袂屬幅於衣。詘而至肘。當臂中爲節。臂骨上下各尺二寸。則袂肘以前尺二寸。〔疏〕袂長二尺二寸。并緣寸半爲二尺三寸半。除去其縫之所殺各一寸。餘有二尺一寸半。在從肩至手。二尺四寸。今二尺一寸之袂。得反詘及肘者。以袂屬於衣。幅闊二尺二寸。身脊至肩。但尺一寸也。從肩覆臂。又尺一寸。是衣幅之畔。覆肩將盡。今屬袂於衣。又二尺一寸半。故反詘其袂。得及於肘也。○〔又〕帶下母厭髀。上母厭脅。當無骨者。〔注〕當骨緩急難爲中也。〔疏〕此深衣帶下於朝祭服之帶也。朝祭之帶則近上。故玉藻云三分帶下。紳居

二焉。是自帶以下四尺五寸也。○又制有十二幅，以應十有二月。

〔注〕裳六幅，幅分之以爲上下之殺。○又袂圓以應規。〔注〕謂胡下也。

○又曲袷如矩以應方。〔注〕袷，交領也。古者方領，如今小兒衣領。作

俗

曲形衣既交，有如矩之象。

○又負繩及踝以應直。〔注〕繩謂袷與後幅相當之縫。

也。踝，跟也。〔疏〕衣之背縫及裳之背縫，上下相當，如繩之正，故曰負

繩，非謂實負繩也。○又下齊如權衡以應平。〔注〕齊，緝。○又故規者

行舉手以爲容。〔注〕行舉手謂揖讓。○又負繩抱方者，以直其政方

其義也。故易曰：坤六二之動，直以方也。〔注〕言深衣之直方，應易之

文也。○又下齊如權衡者，以安志而平心也。〔注〕心平志安，行乃正。

或低或昂，則心有異志者與。○又五法已施，故聖人服之。注言非
法不服也。○又故規矩取其無私，繩取其直，權衡取其平，故先王
貴之，故可以爲文，可以爲武，可以擯相，可以治軍旅，完且弗費，善
衣之次也。注完且弗費，言可苦衣而易有也。深衣者，用十五升布，
鍛濯灰治，純之以采，善衣，朝祭之服也。自士以上，深衣爲之次，庶
人吉服，深衣而已。疏諸侯夕深衣，祭牛肉，大夫士朝元端，夕深衣，
是深衣爲朝祭之次服也。自深衣以後，更無餘服，故知是庶人之
吉服。○玉藻朝元端，夕深衣，深衣三祛，縫齊倍要。注謂大夫士也。
三祛者，謂要中之數也。祛，尺二寸，圍之二尺四寸，三之七尺二寸。

縫紵也。紵下齊倍要中齊，丈四尺四寸。疏大夫士早朝及私朝服元端，其私朝及在家，大夫士夕皆深衣也。深衣裳幅十有二幅，廣二尺二寸，一幅破爲二，四邊各去一寸餘，有一尺八寸，每幅交解之，闊頭廣尺二寸，狹頭廣六寸，此寬頭嚮下，狹頭嚮上，要中十二幅，廣各六寸，故爲七尺二寸，下齊十二幅，各廣尺二寸，故爲一丈四尺四寸，紵謂袂末，齊謂裳之下畔，要謂裳之上畔。

按深衣者，聖賢之法服，衣用正幅，裳之中幅亦以正裁，唯衽在裳旁，始用斜裁，布幅二尺二寸，深衣裳用布六幅，裁爲十二幅，其當裳之前襟後裾正處者，爾雅衣皆謂之以襟，極謂之裾。

布四幅正裁爲八幅，上下皆廣一尺一寸，各邊去一寸爲縫。一幅上下皆正得九寸，八幅七尺二寸，其在上者既足要中之數矣。下齊裳倍於要，又以布二幅斜裁爲四幅，狹頭二寸，寬頭二尺，各去一寸爲縫，狹頭成角，寬頭一尺八寸，皆以成角者向上，以廣一尺八寸者向下，則四幅下廣亦得七尺二寸，合於齊得一丈四尺四寸。此四幅連屬於裳之兩旁，別名爲衽。下文衽當旁是也。所謂非帷裳必殺之者如此。深衣裳無辟積，必須兩旁有斜裁倒縫之衽，方能上狹下廣，意當時或有不用斜裁而作辟積於裳者，故

特記非帷裳必殺之。明夫子深衣必用古制也。

今人製公服亦有衣

裳相連而多作辟積於裳以示異者

鄭注本不誤。孔疏不得其說。妄謂六幅

皆交解。於是裳之前後唯中縫正直。其餘皆成偏裒之縫。

會謂聖賢法服而有是哉。其說易惑人。朱子家禮亦承其

誤。而續衽鉤邊亦多異說矣。

別有深衣考誤一卷詳之

又衽當旁。注衽謂裳幅所交裂也。凡衽者或殺而下。或殺而上。是

以小要取名焉。衽屬衣則垂而放之。屬裳則縫之以合前後。上下

相變。

按衽者斜殺以掩裳際之名。深衣裳前後當中者。不名衽。

唯當旁而斜殺者名衽。故經云衽當旁，明其不當中也。當
中則前襟而後裾是也。鄭云衽謂裳幅所交裂也。玩所之
一字，明其唯在裳旁而名衽者交裂，其餘幅不交裂也。又
云凡衽者或殺而下，或殺而上。此廣解凡裳之衽也。衽有
二：朝服祭服喪服皆用帷裳。前三幅後四幅，裳際不連，有
衽掩之。用布交解，寬頭在上，合縫之，狹頭在下，如燕尾之
形，卽喪服篇衽二尺有五寸是也。彼注云衽所以掩裳際也，二尺五寸與有司紳
齊也，上正一尺，燕尾二尺五寸，凡用布三尺五寸。此衽之殺而下者也。深衣之衽
當裳旁亦交解，而以狹頭向上，寬頭向下。此衽之殺而上

者也。云是以小要取名焉者，謂棺上合縫之木亦名衽也。喪大記曰：君蓋用漆，三衽三束。注云：衽，小要也。蓋小要之形，上下廣而中狹，以掩棺。蓋合縫之際，上半則殺而下，下半則殺而上，似衣衽之上殺下殺，以掩裳際，是以有衽之名。此借衣衽名小要，故鄭連及之也。云衽屬於衣，則垂而放之，謂朝祭喪服之衽。云屬於裳，則縫之以合前後，卽此深衣之衽也。其縫之以合前後者，唯左旁爲然。若右旁則不能縫合，別有鉤邊，鄭亦略言之耳。又以他文證之，問喪云：扱上衽，謂以裳之兩角插於帶間也。爾雅云：執衽謂之

結扱衽謂之櫛。謂以兩裳角執之手，插之帶，而貯物於裳也。論語云：左衽，謂夷俗衽掩於左，其逢合者在右也。皆衽當旁之證也。疏家忽之，并失小要之義，今不錄。

又袂可以回肘。注二尺二寸之節。○又長中繼揜尺。注其爲長衣中衣，則繼袂揜一尺，蓋今褻矣。深衣則緣而已。疏以半幅繼續袂口，揜餘一尺。若長衣揜必用素，中衣揜或布或素，隨其衣而然。長中制同，而名異者，所施異故也。裏中著之，則曰中衣。若露著之，則曰長衣。○又袷二寸。注曲領也。○又袷尺二寸。注袂口也。疏謂口之外畔，上下尺二寸也。喪服袷尺二寸，注云足以容中人之併兩手也。吉時拱尙左手，喪時拱尙右手。○又緣

廣寸半。[注]飾邊也。○[又]以帛裏布，非禮也。[注]中外宜相稱也。冕服，絲衣也。中衣用素皮弁服，朝服。元端，麻衣也。中衣用布。

飾考

飾者飾冠衣裳之邊不止領緣紺緞別有考

深衣具父母，大父母衣，純以纁。具父母衣，純以青。如孤子衣，純以素。純袂緣，純邊，廣各寸半。[注]尊者存，以多飾爲孝。纁，畫文也。三十以下，無父稱孤。純，謂緣之也。緣袂，謂其口也。緣，緡也。緣邊，衣裳之側，廣各寸半，則表裏共三寸矣。唯袷廣二寸。[疏]深衣外衿之邊有緣，裳雖前後相連，然外邊曲裾揜處，其側亦有緣。○[曲禮]爲人子者，父母存，冠衣不純素。[注]爲其有喪象也。純，緣也。玉藻曰：緡冠，元

武子姓之冠也。深衣曰具父母衣。純以青。○又孤子當室冠衣不純采。注早喪親雖除喪不忘哀也。謂年未三十者。三十壯有室有代親之端不為孤也。當室適子也。深衣曰孤子衣純以素。

通考服色相稱

緇衣羔裘云云。孔安國注云服皆中外之色相稱也。疏云凡祭服

先加明衣次加中衣冬則次加袍繭見褻服夏則不袍繭用葛也。見

絺絺次加裘裘上加裼衣此二句注疏刊本缺今補次加祭服若朝服亦先以明

衣親身次加中衣冬月亦有袍繭冬則次加裘裘上加裼衣裼衣之上加

朝服祭服朝服通謂之上服夏則中衣上加葛葛上加裼衣裼衣上加朝服

凡服必中外之色相稱。羔裘黑羊裘也。羔是故用緇衣以裼之。麕

裘鹿子皮以爲裘也。故用素衣以裼之。狐裘黃。故用黃衣以裼之。

按古人服制。衣與冠同色。緇衣則元冠。素衣則皮弁。黃衣則黃冠。欲其上體

稱也。屨與裳同色。素裳者素屨。元裳者黑屨。黃裳者纁屨。欲其下體稱也。帶

亦象衣。緇帶素帶。鞞鞞亦象裳。冕服纁裳赤鞞。爵弁服纁裳鞞。皮弁服素鞞。朝服素裳皆素。

鞞元端元裳三等皆用爵鞞。故裼衣必象上服。使內外稱。今人作文不知緇衣素衣

黃衣之外仍有上服矣。

緇衣羔裘考

疏云。緇衣羔裘者。謂朝服也。玉藻云。諸侯朝服以日視朝於內朝。

士冠禮云。主人元冠朝服。緇帶素鞶。注云。元冠委貌。朝服者十五

升布衣而素裳。

布八十
縷爲升

不言色者。衣與冠同色。是朝服色元。元卽

緇衣之小別。

五入爲緇
六入爲元

玉藻亦云。緇衣以楊之。是羔裘用緇衣。明

其上正服亦緇色也。下云羔裘元冠。不以弔。是羔裘所用配元冠。

羔裘之上。必用緇布衣爲楊。楊衣之上正服。亦是緇色。又與元冠

相配。故知緇衣羔裘。是諸侯君臣日視朝之服也。

在朝君臣同服。
俗解緇衣取象

臣北面。君南面。亦
緇衣。又何以說乎。

按緇衣羔裘。又爲祭服。邾疏不備。補考於後。

王制三公一命卷。疏云。諸侯大夫士自祭。士則元端。大夫則朝服。

故儀禮特牲士祭元端少牢大夫祭朝服○儀禮少牢饋食禮云
筮於廟門之外主人朝服疏云爲祭而筮還服祭服是以上篇特
牲筮亦服祭服○又明日主人朝服卽位於廟門之外

按大夫以朝服爲祭服如冬月必是緇衣羔裘元端卽朝
服之衣易其裳鞞如夫子未爲大夫以元端祭亦必是緇
衣羔裘兼朝祭義始備俗解遺祭服者非

素衣麕裘考

疏云素衣麕裘在國視朔之服也卿大夫士亦然其受外國聘享
亦素衣麕裘故聘禮云楊降立注引玉藻云麕裘青豨褰絞衣以

楊之、豸胡犬絞音

父蒼黃之色又引此云素衣麤裘皮弁時或素衣如鄭此言

則楊衣或絞或素不定也熊氏云臣用絞君用素皇氏云素衣為

正亂言絞耳皇氏說是

○聘禮賓皮弁聘注服皮弁者朝聘主相尊敬

也諸侯視朔皮弁服

視朔重於視朝以視朔服朝聘是相尊敬也

○疏諸侯朝天子服冕

服此待四方朝聘皆皮弁者入天子廟得伸其上服入已廟不可

以冕服

太重

又不可服常朝之服

太輕

故服天子之朝服

天子以皮弁服視朝諸

侯以為視朔之服在廟視朝聘之賓是相尊敬故也

君以皮弁服受聘享故聘

使亦皮弁服

○又云公皮弁迎賓於大門內

按注疏解聘禮所以服皮弁服之意最明既服皮弁則必

素衣麕裘矣。自是服制尊卑相次當如此。並無白色上取

義之意。

俗解白以昭忠信陋矣。

聘享又必兼視朔。義始備。

俗解遺視朔非。

兼考君臣諸楊裘制

玉藻表裘不入公門。注并振絺綌不入公門。解之云振讀為衫。衫

禪也。表裘外衣也。二者形且襲皆當表之乃出。

謂裘葛外必有楊衣且有上服也。

○又襲裘不入公門。注衣裘必當楊也。

謂袒出左袖。

疏楊裘襲裘但據

露楊衣不露楊衣為異。

袒袖則露楊衣不袒則不露。

○又君衣狐白裘錦衣以

楊之。注君衣狐白毛之裘則以素錦為衣覆之使可楊也。袒而有

衣曰楊。

此語最分明。

必覆之者裘襲也。

嘗聞之吳方來編修云今人服裘或以毛向外古人正是如此。

故有皮之不存毛將安傅之說
又有虞人反裘而負薪之喻

詩云衣錦綉衣裳錦綉裳然則錦

衣復有上衣明矣天子狐白之上衣皮弁服與凡裼衣象裘色也

○**又**士不衣狐白注辟君也狐之白者少以少爲貴也疏必知狐

白上加皮弁服者以狐白旣白皮弁服亦白錦衣白三者相稱皆

爲白也天子視朝用皮弁服則天子皮弁之下有狐白錦衣也諸

侯於天子之朝亦然故秦詩云君子至止錦衣狐裘此經云君則

兼天子諸侯也凡在朝君臣同服然則三公在天子之朝執璧與

子男同則皮弁之下狐白錦衣與子男同也其天子卿大夫及諸

侯卿大夫在天子之朝亦狐白裘以下云士不狐白則卿大夫得

衣狐白也。其裼則不用錦衣。見下注。熊氏云：當用素衣爲裼。其天子之士及諸侯之士，在天子之朝，旣不衣狐白，用麕裘素裼也。諸侯在國視朔，則素衣麕裘。其受外國聘享，亦素衣麕裘。玉藻：麕裘青豻褰，綬衣以裼之。皇氏謂素衣爲正。記者亂言綬也。

按玉藻云：以帛裹布，非禮也。皮弁服之布，而用錦衣裼狐白，得無以帛裹布之嫌與？嘗聞之吳方來編修云：凡言錦衣，非通身用錦也。惟以錦爲緣耳。婦人衣錦尚絅者亦然。衣錦尚絅，大夫以上婦人始嫁之服也。行道禦風塵，當覆以絅衣。士昏禮謂之景，中庸惡其文之著，斷章取義耳。

此說可補先儒所未及。然則錦衣仍是素衣。但以素錦飾領及袂耳。又絞素二衣。熊皇異說。皇說爲優。聘禮疏云。鄭引玉藻論語二文者。欲見諸侯與其臣視朔與行聘皆服麤裘。但君則麤裘還用麤裘。臣則不敢純如君。麤裘則青紵褰。裼衣。君臣亦有異。時若在國視朔。君臣同用素衣爲裼。若聘禮。則君臣同用麤裘。但主君則用素衣爲裼。使臣則用絞衣爲裼也。按此說未知是否。又按聘時介裼而不襲。盛禮不在於已也。介旣然爲擯者亦當然。臣從君不得服朝服也。而論語云端章甫願爲小相。似朝服又似元端。

服豈公西華謙退言之與

玉藻君子狐青裘豹褰元綃衣以裼之注君子大夫士也綃綺屬也染之以元於狐青裘相宜狐青裘蓋元衣之裘疏熊氏云六冕皆有裘此云元謂六冕及爵弁也則天子諸侯皆然而云大夫士者君用純狐青大夫士雜以豹褰熊氏又以內外諸侯朝服皆緇衣以羔爲裘不用狐青也劉氏云凡六冕之裘皆黑羔裘也故司服云祭昊天大裘而冕以下冕皆不云裘皆用羔裘也又論語緇衣羔裘皆祭於君之服是祭服用羔裘也劉氏又以此元衣爲元端與皇氏同三家之說雖各有通途皆互有長短熊氏之說踰於

二家論語註云緇衣祭於君之服者謂助君祭朝服而祭也亦卿大夫祭於君之服也

按以帛裏布非禮。綃是綺屬則上服必是絲衣。皇劉以爲元端誤矣。但冕服之裘旣當用元綃衣。楊狐青。夫子亦嘗爲大夫服冕助君祭何以止有緇衣羔裘而無元綃狐青。又似如劉氏說冕服皆羔裘意當時魯君之祭皆是緇衣羔裘故夫子亦無狐青而記者廣言他國冕服有此裘與疏解論語鄭註謂助君祭朝服而祭言此緇衣羔裘爲朝服之裘非謂元衣素裳之朝服也助君祭當服冕服元衣

用絲。又按鄭註專言助君祭，亦未備。自祭家廟以朝服，亦當緇衣羔裘。

又麤裘青豻裘，絞衣以裼之。注：豻，胡犬也。絞，蒼黃之色也。孔子曰：素衣麤裘。○又羔裘豹飾，緇衣以裼之。注：飾，猶裘也。孔子曰：緇衣羔裘。

按麤裘疏說見前，疑此亦是記者廣言之。夫子無此裘，蓋未製此裘也。魯人有麤裘之謗，詳見一卷。胡犬之色，當是蒼黃，故以蒼

黃之色裼之。凡裼者，袒出左袖，故裼衣但象其袖，不論其裘身。以豹飾狐，青飾羔，而裼皆以黑色，蓋豹亦用黑色也。

詩鄭風羔裘豹飾傳云緣以豹皮也疏云唐風羔裘豹祛羔裘豹袖然則緣以豹皮爲祛袖也禮君用純物臣下之故袖飾異皮按此說是然則夫子羔裘麕裘亦當有他皮飾袖論語不言者省文耳

黃衣狐裘考

邢疏黃衣狐裘謂大蜡息民之祭服也人君以歲事成熟搜索羣神而報祭之謂之大蜡又臘祭先祖五祀因令民大飲農事休息謂之息民

俱詳見十卷

於大蜡之後作息民之祭其時則有黃衣狐裘

也大蜡之祭與息民異息民用黃衣狐裘大蜡則皮弁素服二者

不同以其息民大蜡同月其事相次故連言之耳知者郊特牲云
蜡者索也歲十二月合聚萬物而索饗之也皮弁素服而祭素服
以送終葛帶榛杖喪殺也是大蜡之祭用素服也其下又云黃衣
黃冠而祭息田夫也註云謂既蜡臘先祖五祀也於是勞農以休
息之是息民之祭用黃衣也此說孔子之服云黃衣狐裘玉藻云
狐裘黃衣以裼之以此知大蜡息民則有黃衣狐裘也俗解蜡祭服者謬

○玉藻狐裘黃衣以裼之註黃衣大蜡時臘先祖之服也孔子曰
黃衣狐裘疏此息民謂之臘故月令孟冬云臘先祖五祀○郊特
牲黃衣黃冠而祭息田夫也註祭謂既蜡臘先祖五祀也於是勞

農以休息之。○又野夫黃冠。黃冠草服也。注言祭以息民。象其時物之色。季秋而草木黃落。

按三裘之色。羔麕緇素。服制差次當如此。不以色取義。惟黃衣狐裘。象其時草木黃落。此說得之。俗解謂報土功者。臆說也。草木黃落。在季秋孟冬。亦當其時稍有早晚耳。

考祖裼襲之異

聘禮公側授宰玉。裼降立。受玉時襲既受以玉。授宰裼而降立以待享。注裼者。免上衣。

見裼衣。凡檀裼者左。祖出左袖也。疏凡服四時不同。假令冬有裘。觀身

有禪衫。又有襦袴。襦袴之上有裘。裘上有裼衣。裼衣之上有上服。

皮弁祭服之等。若夏以絺綌，絺綌之上，則有中衣。中衣之上，復有上服。皮弁祭服之等。若春秋二時，則衣袷褶，袷褶之上，加以中衣。中衣之上，加以上服也。聘禮不必行於冬，故四時皆有裼衣者，謂開衿前上服，見裼衣也。聘禮不必行於冬，故四時皆有裼衣也。裼不止施於裘，中衣卽裼衣也。云見裼衣者，謂開衿前上服，見裼衣也。開衿方可袒出袖，其實見左袖裼衣。故玉藻云裘之裼也，見美也。襲者掩之，故云襲充美也。言凡禮裼者左者，吉凶皆袒左是也。是以士喪禮主人左袒，大射亦左袒。若受刑則袒右，故覲禮侯氏袒右受刑是也。

按古人有袒袖之禮，行禮時開出上服前衿，袒出左袖，喪

禮插諸面之右。

士喪禮主人左袒，扱諸面之右，扱卽插字。

吉禮亦當以左袖插

諸前衿之右也。凡經傳單言袒者，袒而無衣。肉袒也。言楊或連言袒裼者，袒而有衣也。喪禮肉袒，祭禮迎牲割牲，養老禮割牲，皆肉袒。射禮惟君袒纁襦，餘皆肉袒，而以拾韜左臂。拾以皮爲之君在，大夫射則肉袒，覲禮侯氏請事，右肉袒。

與尋常左袒者不同，謂刑宜於右也。左傳鄭伯肉袒牽羊，謝罪也。古人自是有左袒右袒之法，故至漢初周勃討呂氏，有爲劉氏左袒，爲呂氏右袒之說。凡與襲對者，皆是袒左袖，露裼衣。襲則掩其上服，不袒袖。別無所謂襲也。鄭註玉藻袒而有衣曰裼，合之此註，凡袒裼者左，可知袒裼之

義矣。知裼則知襲矣。後人不知裼襲之禮。雖草廬吳氏猶云直其領而露裼衣謂之裼。曲其領而掩蔽裼衣謂之襲。經義之難明如此。況後世講章時文家。何能由注疏以通經乎。解經亦有知左袒之說者。又以詩檀裼暴虎。孟子袒裼裸裎爲疑。不知古禮與今人情不合者多。倘謂古人不以袒袖行禮。則內則所謂在父母舅姑之所。不有敬事。不敢袒裼者。又何以說乎。裼衣上便是上服。更無襲衣。此疏說是。

曲禮執玉其有藉者則裼。疏裼所以異於襲者。凡衣近體有袍襪

之屬。其外有裘。夏則衣葛。其上有裼衣。裼衣上有襲衣。襲衣之上。有常著之服。則皮弁之屬也。掩而不開。則謂之襲。若開此皮弁及中衣。左袒出其裼衣。謂之爲裼。故鄭注聘禮云。裼者。左袒也。

按此謂裼衣上有一重襲衣。又爲中衣。與賈疏異。非是其云左袒出其裼衣。謂之爲裼。甚分明。孔疏前後有不同者。見下。

檀弓曾子襲裘而弔。子游裼裘而弔。疏凡弔喪之禮。主人未變之前。弔者吉服而弔。謂羔裘元冠。緇衣素裳。又袒去上服。以露裼衣。主人既變之後。雖著朝服。而加武以經。又掩其上服。○喪大記弔

者襲裘。疏小斂之後，來弔者掩襲裘之上，楊衣。若未小斂之前，來弔者裘上有楊衣。楊衣上有朝服，開朝服露楊衣。今小斂之後，弔者以上服掩襲裘上楊衣。

按此二疏，裘之外是楊衣，楊衣外是上服，別無一重襲衣。與賈疏合。曲禮疏偶誤耳。凡言裘外有二重衣者，非是。

考楊襲質文相變之異

樂記升降上下，周旋楊襲，禮之文也。○表記子曰：楊襲之不相因也，欲民之母相瀆也。注：不相因者，以其或以楊爲敬，或以襲爲敬。禮盛者以襲爲敬，執玉龜之屬也。禮不盛者以楊爲敬，受享是也。

疏又賓介自相授玉之時介禮輕裼而執圭以授賓賓禮重則襲而後受圭是賓之與介亦裼襲不相因○玉藻禮不盛服不充故大裘不裼注禮盛者服充大事不崇曲敬大裘不裼謂祭天也疏充猶襲也服襲是充美於內唯盛禮乃然也故聘及執玉龜皆襲是爲盛禮故也郊禮盛服大裘則無別衣裼之裘不可表大裘亦必有裼衣但不袒耳是不見美也○玉藻犬羊之裘不裼注質略亦庶人無文飾○又文飾也不裼注裼主於有文飾之事疏聘禮使臣行聘之時主於敬不主於文故襲裘聘是不文飾之事不袒裘也至行享之時主於文故裼裘主於敬者禮盛主於文則禮不盛○又裘之裼也見美也注君

于於事以見美爲敬。疏裘上加裼衣。裼衣上雖加他服。猶開露裼衣。見裼衣之美。以爲敬也。

按見美者。見裘之美也。裘雖在裼衣內。裼衣與裘同色。見裼衣則知其是某裘。疏謂見裼衣之美。非是。君以錦衣裼狐白裘。亦是見狐白之美也。

又弔則襲。不盡飾也。注喪非所以見美。此謂主人旣小斂以後。又君在則裼。

盡飾也。注臣於君所也。疏凡君在之時。則露此裼衣。盡其文飾之道。以敬於君也。○又服之襲也。充美也。注充猶覆也。所敬不主於君。則襲。疏此謂君之不在。臣所加上服。掩襲裼衣。以君不在。敬心

殺故也。凡敬有二體。一則父也。二則君也。父是天性至極。以質爲敬。故子於父母之所。不敢袒裼。君非血屬。以文爲敬。故臣於君所。則裼。若平敵以下。則亦襲以其質。略故也。所襲雖同。其意異也。聘禮行聘。致君命。亦襲者。彼是聘享相對。聘質而享文。欲文質相變。故裼襲不同也。○又是故尸襲。注尸尊。疏尸處尊位。無敬於下。故襲也。○又執玉龜襲。注重寶瑞也。疏凡執玉得襲。故聘禮執圭璋致聘。則襲也。若執玉行享。雖玉裼。執玉又分質文此執玉或容非聘享。尋常執玉則亦襲也。龜是享禮庭實之物。執之亦裼。若尋常所執及卜則襲。敬其神靈也。○又無事則裼。弗敢充也。注謂已致龜玉也。

疏謂行禮已致龜玉之後，則裼不敢充覆其美也。亦謂在君之前，故裼也。若不在君所無事，則襲。前文云者是也。

按裼襲所以分別文質。質事用襲，文事用裼。質又有三：一是禮盛爲質，一是輕略爲質，一是父黨無容爲質。又按見美充美，惟據冬月有裘言之。餘三時無裘，亦行裼襲之儀，但取質文相變以爲敬耳。

內則在父母舅姑之所，不有敬事，不敢袒裼。**注**父黨無容。

按在父母舅姑之所，而有敬事，當袒裼。**注**疏無明文，大抵袒裼襲之儀，惟施於君臣聘享，平時居家處鄉，皆襲而已。

喪禮之祖則異祭禮亦皆襲唯君肉袒割牲爲敬之至餘皆襲

聘禮公皮弁迎賓於大門內大夫納賓注於是賓主人皆裼疏玉藻云不文飾也不裼又云執玉龜襲下文行聘時執玉賓主人皆襲此時未執玉正是文飾之時明賓主人皆裼也○又賈人東面坐啟櫝取圭垂纁不起而授上介注不言裼襲者賤不裼也○又上介不襲執圭屈纁授賓注上介授賓不襲者以盛禮不在於己也曲禮曰執玉其有藉者則裼無藉者則襲疏以垂纁爲有藉屈纁爲無藉非是今不錄○又賓襲執圭注執圭盛禮而又盡飾爲其相蔽敬也疏執圭

以瑞爲敬君。又盡飾而裼，則掩執玉之敬，故不得裼也。○又公側襲受玉。○又公側授宰玉，裼降立。[注]裼者，免上衣，見裼衣。凡當盛禮者，以充美爲敬，非盛禮者，以見美爲敬。禮尚相變也。非冬月服裘時，唯取禮尚相變。○又擯者出，請賓裼，奉束帛加璧享。○聘禮記：凡執玉無藉者，襲。[注]藉謂繅也。繅所以蘊藉玉。

按圭璋特達，不用束帛爲藉，是無藉也。[注]以繅爲藉，非是。如以繅爲藉，則屈繅時正是以繅藉圭，當爲有藉矣。而云無藉何耶？鄭解此句誤。疏家因有垂繅屈繅之說。

曲禮：執玉其有藉者則裼，無藉者則襲。[注]藉，繅也。裼，襲文質相變。

耳有藻爲文。楊見美亦文。無藻爲質。充美亦質。圭璋特而襲璧琮。加束帛而謁。亦是也。

按有藉無藉。注兼二義。非也。以後說爲是。朱子修禮書引此條。斷從後說。

裘制雜考

召南羔羊序。召南之國。化文王之政。在位皆節儉正直。德如羔羊也。疏。國人因事託意見。在位者裘得其制。德稱其服。春官宗伯注云。羔取其羣而不失其類。士相見注云。羔取其羣而不黨。公羊傳何休云。羔取其執之不鳴。殺之不號。乳必跪而受之。死義生禮者。

此羔羊之德也。詩羔羊之皮，素絲五紕，退食自公，委蛇委蛇。傳小
曰羔，大曰羊，素，白也。紕，數也。古者素絲以英裘，不失其制。大夫羔
裘以居，公、公門也。箋委蛇，委曲自得之貌。疏大夫之裘，宜直言羔，
兼言羊者，以羔亦是羊，故連言以協句。此言紕數，下言總之數有
五，非訓紕總之數也。大夫羔裘以居，謂居於朝，非居於家也。論語
狐貉之厚以居，注云在家，所以接賓客，則在家不服羔裘矣。論語
注又云緇衣羔裘，諸侯視朝之服，卿大夫朝服亦羔裘，唯豹袷與
君異耳。明此爲朝服之裘，非居家也。○又羔羊之革，素絲五緇。傳
革猶皮也。緇，縫也。疏說文獸皮治去其毛曰革，革更也。對文言之。

異散文則皮革通爾雅釋訓云緼羔羊之縫也孫炎曰緼之爲界
緼然則縫合羔羊皮爲裘縫卽皮之界緼因名裘縫爲緼五緼旣
爲縫則五紵五總亦爲縫也織素絲爲組紃以英飾裘之縫中若
線則所以縫裘非飾也○又羔羊之縫素絲五總傳縫言縫殺之
大小得其制總數也疏首章言羔羊之皮卒章言羔羊之縫互見
其用皮爲裘縫殺得制也依月令孟冬始裘天子祭天則大裘而
冕注大裘黑羔裘是也其五冕之裘亦同黑羔裘若天子視朝及
諸侯朝天子皆以狐白裘知者以玉藻云君衣狐白裘錦衣以裼
之又秦詩曰君子至止錦衣狐裘以裘象衣色皮弁服白布衣故

也。其卿大夫在朝及聘問，亦衣狐白裘。知者玉藻云：士不衣狐白。故也。士則麕裘、青豸裘，以狐白之外，惟麕裘素也。其諸侯視朝及卿大夫等，同用黑羔裘。若諸侯視朔，君臣同用麕裘；其臣則青豸裘、綬衣爲裼。若兵事，旣用韎韐，衣則用黃衣、狐裘及狸裘，象衣色故也。傳云：臧之狐裘，敗我於狐貍。又云：皙纁而衣狸製，是也。若天子以下田獵，則羔裘緇衣以裼之。其天子諸侯燕居，同服元端，則亦同服羔裘矣。凡裘，君則用全，其臣則褻飾爲異。故詩云：羔裘豹祛。鄭云：卿大夫之服是也。天子諸侯朝祭之服，先著明衣，又加中衣，又加裘。裘外又加裼衣，裼衣之上，乃加朝祭之服。○鄭風羔裘

如濡洵直且侯彼其之子舍命不渝羔裘豹飾孔武有力彼其之子邦之司直羔裘晏兮三英粲兮彼其之子邦之彥兮傳如濡潤澤也侯君也豹飾緣以豹皮也晏鮮盛貌集傳云三英裘飾粲明也○唐風羔裘豹袂○又羔裘豹褰傳袂袂也疏袂是袖之大名袂是袖頭之小稱其通皆爲袂○檜風羔裘序傳國小而迫君不用道好絜其衣服逍遙遊燕而不能自強於政治故作是詩也○詩羔裘逍遙狐裘以朝傳羔裘以遊燕狐裘以適朝箋諸侯之朝服緇衣羔裘大蜡而息民則有黃衣狐裘今以朝服燕祭服朝是其好潔衣服也疏知非狐白狐青必知是黃衣狐裘者以諸侯之服

狐白裘唯在天子之朝。在國視朔之服。則素衣麕裘。無狐白裘矣。狐青乃人功粗惡之裘。檜君好絮。必不服之。○又羔裘黼黻。狐裘在堂。傳堂公堂也。疏上言以朝。謂日出視朝。此云在堂。謂正寢之堂。人君日出視朝。乃退適路寢。以聽大夫所治之政。二者於禮同服羔裘。今檜君皆用狐裘。故二章各舉其一。○又羔裘如膏。日出有曜。疏檜君所服羔裘衣色潤澤如脂膏然。日出有光照曜之時。觀其裘色如脂膏也。○天官司裘掌爲大裘。以其王祀天之服。中秋獻良裘。季秋獻功裘。以待頒賜。注大裘黑羔裘服。以祀天示質。良裘王所服也。玉藻所謂黼裘與。功裘人功微麕。謂狐青麕裘之

屬功裘。卿大夫所服。〔疏〕祭服皆元上纁下，明此裘亦羔裘之黑者。鄭志：大裘之上，又有元衣，與此裘同色，亦是無文采。玉藻：君子狐青裘豹褱，麕裘青豸褱。注云：君子大夫士也。引此證功裘中有此以待頒賜。玉藻仍有羔裘狐裘，亦是臣之所服裘，不引之者，之屬中含之矣。○〔玉藻〕唯君有黼裘以誓省，大裘非古也。〔注〕僭天子也。天子祭上帝，則大裘而冕，大裘羔裘也。黼裘以羔與狐白雜爲黼文也，省當爲獮，獮，秋田也。國君有黼裘，誓獮田之禮。時大夫猶有大裘也。〔疏〕禮唯許諸侯服黼裘，以誓軍衆田獵耳，不得用大裘。當時非但諸侯用大裘，又有大夫僭用大裘者，故譏之。○〔又〕君之右虎

裘厥左狼裘注衛尊者宜武猛○檀弓練鹿裘衡長祛祛裼之可

也注練小祥

父母之喪期年也

衡當爲橫祛謂褻緣袂口也練而爲裘橫

廣之又長之又爲祛則先時狹短無祛可知吉時麤裘裼表裘也
有祛而裼之備飾也疏喪雖有裘裘上未有裼衣至小祥裘既橫
長又有祛爲吉轉文故加裼之可也○小雅西人之子粲粲衣服
舟人之子熊羆是裘傳舟人舟楫之人熊羆是裘言富也

褻裘狐貉考

爾雅狸狐貉

音猓 猓 貉 字

醜其足蹠

音頤其跡夙

音鈕

注皆有掌蹠夙指

頭處疏此四獸之類皆有掌蹠左傳熊蹠是其類也其指頭著地

處名夙

按說文狐有三德其色中和小前大後死則邱首獬似狐善睡獸王褒云襲狐貉之煖者不憂至寒之凄愴莊子云

豐狐文豹棲於山林不免陷阱之患其皮爲之災也坤雅狐性好疑貉性好睡故狐貉之厚以居

○**爾風**一之日

于貉取彼狐狸爲公子裘箋于貉往搏貉以自爲裘也狐狸以其尊者疏以經狐狸以下爲公子裘明于貉是自爲裘也禮無貉裘之文唯孔子服狐狸裘以居明狐狸賤故也左傳稱齊大夫東郭書衣貍製服虔云貍製貍裘也禮言狐裘多矣知狐裘以其尊者○**小雅**彼都人士狐裘黃黃其容不改出言有章行歸于周萬民所望箋古明王時都人之有士行者冬則衣狐裘黃黃然取溫裕而已疏息民之祭服此狐裘則是尊貴之服庶人得服之者彼狐

之黃者多，黃狐之衣，非貴服也。玉藻云：犬羊之裘不裼，則庶人止。

服犬羊，此衣狐裘者，以禮不下庶人也。以庶人服犬羊不裼，故此

狐裘亦不裼，取其溫裕而已。○左傳：衛右宰穀曰：余狐裘而羔褻。

注言一身盡善，唯少有惡，喻己雖從君出，其罪不多。疏：玉藻君衣

狐白裘，又曰錦衣狐裘，是狐裘貴於羔。按天子大裘亦是黑羔裘，

於羔此蓋喻始惡而終美，言始從。○邶風：狐裘蒙戎。傳：蒙戎，亂貌。

君是狐裘，今來歸補過，似羔袖也。○檀弓：晏子一狐裘三十年。

左傳：士薦賦曰：狐裘尨茸，亦亂貌。按裘裘卽狐貉之裘。玉藻云：犬羊之裘不裼，注謂庶人無

文飾，然則犬羊是庶人之裘，宜非君子所服也，唯宜狐貉。

而已。禮服之狐裘欲其文，其毛當與褻服之狐裘異。褻裘長，則禮服之裘宜短，以其行禮時有升降上下，長則不便於行禮也。褻裘之外，當服深衣，深衣卽所以襲裘者。犬羊之裘不裼，則褻裘亦不裼也。

明衣考

士喪禮記明衣裳用幕布。袂屬幅。長下膝。注幕布帷幕之布，升數未聞也。屬幅，不削幅也。長下膝，又有裳於蔽下，體深也。疏衣裳同用幕布，云袂屬幅，長下膝者，唯據衣而言，布幅二尺二寸，凡用布皆削去邊幅旁一寸，爲二寸計之，則此不削幅，謂繚使相著，還似

袂二尺二寸。凡爲衣。以其有裳。故不至膝下。此又有裳而言下膝。故云於蔽下體深也。○又有前後。裳不辟。長及轂。注不辟積也。轂足跗也。凡他服短無見膚。長無被土。疏不辟積者。以其一服不動。不假上狹下寬也。此裳及轂至足跗。亦是不被土。○又縗緇緇。注一染謂之縗。今紅也。飾裳在幅曰緇。在下曰緇。疏深衣云。純袂純邊。注云。純謂緣之也。緣邊衣裳之側。廣各寸半。則表裏共三寸。此在幅亦衣裳之側。緣法如彼也。○又緇純。音準注七入爲緇。緇。黑色也。飾衣曰純。謂領與袂衣以緇。裳以縗。象天地也。

按明衣無考。士喪記襲尸之明衣。沐浴後著之。未知生時

明衣其制同否。陳祥道禮書云。明衣之袂屬幅而不削。明衣之裳前三後四而不辟積。衣之長也。下膝與要廣者異矣。裳之長也。及足跗與無見膚者異矣。今據疏不辟積者。以其一服不動。若生時明衣當必有辟積。又按他服在內者不殊裳亦無緣。而明衣親身衣裳殊。上下皆有緣。意者特爲齊時制之與。記云齊之元也以陰幽思也。則齊時仍有黑色之衣。卽元端。

絺綌考

論語當暑絺綌必表而出之。注孔安國曰。暑則單服。絺綌葛也。

必表而出之。加上衣。疏：衿，單也。暑同單服，必加尙表衣，然後出之，爲其形褻故也。○曲禮：衿，締綌，不入公門。注：衿，單也。孔子曰：當暑，衿，締綌，必表而出之，爲其形褻。疏：上無衣表，則肉露見，爲不敬。○玉藻：振締綌，不入公門。表裘不入公門。注：振，讀爲衿。衿，單也。表裘，外衣也。二者形且褻，皆當表之乃出。疏：形，解衿締綌，其形露見。褻，解表裘在衣外，可鄙褻。二者皆上加表衣乃出也。

按注疏說，皆以表爲在締綌外，出之爲出門。唯集註改舊說，今從集註。締綌內雖有裏衣，如入公門，見賓客，締綌外，仍當有衣裏衣，如今人之汗衫也。

地官掌葛掌以時徵絺綌之材於山農。○月令孟夏天子始絺。○周南葛之覃兮，施于中谷，維葉萋萋。傳覃延也。葛所以爲絺綌，女功之事，煩辱者，施移也。萋萋茂盛貌。○又葛之覃兮，施于中谷，維葉莫莫，是刈是濩，爲絺爲綌，服之無斁。傳濩煮之也。斁厭也。○邶風絺兮綌兮，淒其以風。箋絺綌所以當暑，今以待寒，喻其失所也。○鄘風絜兮絜兮，其之展也。蒙彼絺綌，是紕袷也。傳禮有展衣者，以丹縠爲衣，蒙覆也。絺之靡者爲縠，是當暑袷延之服也。箋后妃六服之次，展衣宜白，縠絺，綌之屬，感者展衣，夏則裏衣，縠絺，疏葛精尤細靡者，縠也。言細而縠縠，紕袷者，去熱之名。束縛意。袷延

是熱之氣也。

按集註雖引蒙彼縐絺。然詩意是以展衣蒙於縐絺之外。

褻服考

論語紅紫不以爲褻服。注王肅曰褻服私居服非公會之服皆不

正。褻尙不衣。正服無所施。○玉藻非列采不入公門。注列采正服

○又續爲繭。繭爲袍。注衣有著之異名也。有物在衣中爲著。續謂今之新

繭也。繭謂今續及舊絮也。疏鄭以好者爲繭。惡者爲絮。○又禪爲

紵。帛爲褶。音牒。注紵有衣裳而無裏。褶有表裏而無著。

按在內之衣又名澤。詩與子同澤。以其親膚近於垢澤也。

又曰袒服見左傳

紺緇考

論語君子不以紺緇飾注孔安國曰一人曰緇飾者不以爲領袖緣也紺者齊服盛色以爲飾衣似衣齊服緇者三年練以緇飾衣爲其似衣喪服故皆不以爲飾衣疏紺元色緇淺絳色考工記三入爲緇五入爲緇今孔氏云一人曰緇者未知出何書檀弓云練練衣黃裏緇緣注云小祥練冠練中衣以黃爲內緇爲飾黃之色卑於緇緇之類明外除故曰爲其似衣喪服說文云紺帛深青揚赤色是紺爲青赤色也故爲齊服盛色若以爲領袖緣飾則似

衣齊服也。

按紺緌皆赤黑之間色。緌又黑於紺。君子不以爲飾者。謂其非正色也。飾必用正色。如深衣篇純以纁。純以青。純以素是也。不以紺緌爲飾。猶之不以紅紫爲褻服耳。緌又入黑爲緌。爲元。齊時服元冠元端。而孔氏云齊服是誤。以紺爲元矣。練衣本以一染之緌爲緣。而孔氏云練服是誤。以緌爲緌矣。邢疏不能辨正。集註亦因之耳。

考工記鍾氏染羽。三人爲纁。五人爲緌。七人爲緌。注染纁者。三人而成。又再染以黑則爲緌。緌今禮俗文作爵。言如爵頭色也。又復

再染以黑，乃成緇矣。鄭司農云：以論語曰「君子不以紺緇飾」，又曰「緇衣羔裘」。爾雅曰：「一染謂之緇，再染謂之緇，三染謂之緇。」

同顏丑
貞反

三染謂之緇

詩云：「緇衣之宜兮。」元謂此同色耳。染布帛者，染人掌之。天官凡元色

者在緇緇之間。其六入者與。疏凡染纁元之法，取爾雅及此相兼

乃具。此經及爾雅不言四入及六入。士冠有朱紱之文。鄭云：朱則

四入與。是更以纁入赤汁，則爲朱。以無正文，約四入爲朱。故云與

以疑之。淮南子云：以涅染紺，則黑於涅。涅則黑色。纁若入赤汁，則

爲朱。若不入赤而入黑汁，則爲紺矣。若更以此紺入黑，則爲緇。此

五入爲緇是也。紺緇相類之物，故連文。若更以此緇入黑汁，則爲

元但無正文更以元入黑汁則名七入爲緇矣但緇與元相類故禮每以緇布衣爲元端也云禮俗文作爵言如爵頭色者以其爵赤多黑少故也

紅紫考

玉藻衣正色裳間色注謂冕服元上纁下疏元是天色故爲正纁是地色赤黃之雜故爲間色五方間色綠紅碧紫駟黃是也青是東方正綠是東方間木尅土故綠色青黃也赤是南方正紅是南方間火尅金故紅色赤白也白是西方正碧是西方間金尅木故碧色青白也黑是北方正紫是北方間水尅火故紫色赤黑也黃

是中央正。駟黃是中央間。土尅水。故駟黃之色黃黑也。○爾雅一染謂之縑。再染謂之頰。三染謂之纁。注縑今之紅也。頰淺赤。纁絳也。疏說文云。縑黃赤色。喪服記云。公子爲其母練冠麻衣。縑緣是也。士冠禮疏云。從一染至三染。皆謂之淺絳也。按古絳字與紅同音。卽紅也。○

又茹蘆茅蒐。注今之蒨也。可以染絳。疏茹蘆一名茅蒐。詩茹蘆在

阪。陸璣云。一名地血。齊人謂之茜。卽今之茜草。○又藐苳草。苳音可

以染紫。一名苳蒨。音疏藐一名苳草。根可染紫。卽今紫草。○鄭風縞衣

茹蘆。聊可與娛。傳茹蘆茅蒐之染女服也。箋茅蒐染巾也。○地官

掌染草。掌以春秋斂染草之物。注染草茅蒐紫蒨之屬。紫蒨卽紫蒨。

按孔子言惡紫之奪朱。當時尙紫亦有漸。元冠紫綏。自魯桓公始。戰國策云。齊紫敗素也。而賈十倍。蓋齊桓公有敗素。染以爲紫。下令貴紫。人爭買之。賈十倍。管子言齊桓公好服紫。齊人尙之。五素而易一紫。其貴紫有由來矣。哀十七年。衛渾良夫紫衣狐裘。太子數其三罪殺之。紫衣居一。杜注。紫衣僭君服。可見當時君服紫。

寢衣考

論語必有寢衣。長一身有半。注。孔安國曰。今之被也。

按寢衣之制無考。或是夫子特製之。以爲齊時之用。孔注。

謂今之被則不當名寢衣。夜寢必覆被，亦不當特記矣。言衣則必有袂者也。被名衾，詩抱衾與裯，毛傳衾被也。裯，禪被也。鄭箋改之云：裯，牀帳也。今集傳仍從毛。喪大記：君錦衾，大夫縞衾，士緇衾。詩言錦衾爛兮，不必君也。被端有緣，飾謂之統。喪大記注：統以組，類爲之，綴之領側。若今被識生時禪被有識，此衾制附於此。

帶紳考

左傳：鞶厲游纓，昭其數也。**注**：鞶，紳帶也。一名大帶。厲，大帶之垂者。游，旌旗之游。纓，在馬膺前，數尊卑各有數。**疏**：易或錫之鞶帶，知鞶

卽帶也。以帶束要，垂其餘以爲飾，謂之紳。上帶爲革帶。

所以繫鞅，鞅與韠佩。

在大帶之上。

故云鞮紳帶，所以別大帶也。大帶之垂者，名之爲紳，而復

名爲厲者，紳是帶之名，厲是垂之貌。詩稱垂帶而厲是也。玉藻紳

長制，士三尺，有司二尺有五寸。又大夫以上，帶廣四寸，士廣二寸。

是鞮厲有數也。

○玉藻

天子素帶朱裏終辟。

音裨

而素帶終辟。大夫

素帶辟垂，士練帶率。

音律

下辟，居士錦帶，弟子縞帶，并紐約用組三

寸，長齊於帶。紳長制，士三尺，有司二尺有五寸。子游曰：參分帶下

紳居二焉。紳鞶結三齊。注：謂大帶也。而素帶終辟，謂諸侯也。諸侯

不朱裏，合素爲之。下，天子也。大夫亦如之。率，綷也。士以下皆鞶，不

合而繹積、如今作幪頭爲之也。辟讀如裨、冕之裨、裨謂以繒采飾其側、人君充之、大夫裨其紐及末、士裨其末而已。居士、道藝處士也、三寸謂約帶紐組之廣也、長齊於帶、與紳齊也、紳、帶之垂者也、言其屈而重也、有司、府史之屬也、三分帶下而三尺、則帶高於中也、結、約餘也、疏天子以素爲帶、用朱爲裏、終竟帶身在要及垂皆裨、諸侯不以朱爲裏、亦用朱絲終裨、大夫不終裨、但以元華裨其身之兩旁、及屈垂者、士用熟帛練爲帶、其帶用禪帛、兩邊繹而已、繹謂縷緝也、士帶必反屈嚮上、又垂而下、大夫則總皆裨之、士則用緇、唯裨嚮下一垂者、居士用錦爲帶、尙文、弟子用生編爲帶、尙

質并竝也。紐謂帶之交結之處，以屬其紐約者，謂以物穿紐約結其帶，謂天子以下，其所紐約之物，竝用組爲之，組闊三寸也。約紐組餘三尺，與帶垂者齊，引子游之言，以證紳之長短，人長八尺，大帶之下，四尺五寸，分爲三分，紳居二分焉。紳長三尺也。鞞謂蔽膝，紳鞞結，三者俱長三尺也。○又大夫大帶四寸，雜帶君朱綠，大夫元華，士緇辟二寸，再繅四寸，凡帶有率無箴功。注：雜猶節也，卽上之裨也。君裨帶上以朱，下以綠，終之。大夫裨垂，外以元，內以華，華黃色也。士裨垂之下，外內皆以緇，是謂緇帶。大夫以上以素，皆廣四寸，士以練，廣二寸，再繅之。凡帶有司之帶也，亦緯之如士帶矣。

無箴功則不裨之。士雖絰帶裨亦用箴功。凡帶不裨下士也。○又肆束及帶勤者有事則收之走則擁之。注肆讀爲肄肄餘也。餘束約紐之餘也。勤謂執勞辱之事也。疏收謂歛持在手擁謂抱之於懷。○又凡侍於君紳垂。注紳垂則磬折也。○曹風淑人君子其帶伊絲。箋謂大帶也大帶用素絲有雜色飾焉。○小雅彼都人士垂帶而厲。傳厲帶之垂者。○又匪伊垂之帶則有餘。○大戴禮武王帶之銘曰火滅修容慎戒必恭恭則壽。注雖夜寢其容不可以苟帶先釋故因言之。

佩考

玉藻古之君子必佩玉。[注]比德焉。君子士已上。○又右徵角。左宮

羽。[注]玉聲所中也。徵角在右。事也。民也。可以勞。宮羽在左。君也。物

也。宜逸。周禮三大祭之樂無商調。此亦無商音似有所避。○又趨以采齊。[注]路門外之樂

節。至應門謂之趨。齊當爲楚薺之薺。疏讀爲楚茨之茨。音同耳。其

義則異。○又行以肆夏。[注]登堂之樂節。○又周還中規。[注]反行也

宜圍。○又折還中矩。[注]曲行也。宜方。○又進則揖之。退則揚之。然

後玉鏘鳴也。[注]揖之謂小俛。見於前也。揚之謂小仰。見於後也。鏘

聲貌。○又故君子在車則聞鸞和之聲。行則鳴佩玉。是以非辟之

心無自入也。[注]鸞在衡。和在式。自由也。

按大戴禮韓詩內傳皆言在衡爲鸞在軾爲和。非也。軾非設鈴之所。軾若有和。車行與軾相觸。不成聲矣。左傳錫鸞和鈴。杜注鸞在鑣。和在衡。此說是。疏云衡之所容。唯兩服馬。詩每言八鸞。當謂馬有二鸞。若在衡。安得置八鸞乎。以此知鸞必在鑣。和在衡。和不言數。當是衡端各一和。

大戴禮保傅篇。上車以和鸞爲節。下車以佩玉爲度。上有蔥衡。下

有雙璜。衡牙。玼珠以納其間。琚瑀以雜之。行以采芡。趨以肆夏。

二句

與玉藻異。步環中規。折還中矩。進則揖之。退則揚之。然後玉鏘鳴也。注

衡平也。半璧曰璜。衡在中。牙在傍。玼珠納於衡璜之間。玼亦作蟻。

總曰玼珠而赤者曰琚、白者曰瑀、或曰瑀美玉、琚石次玉。○玉藻
君在不佩玉，左結佩，右設佩。注：謂世子也。出所處而君在焉，則去
德佩而設事佩，辟德而示卽事也。結其左者，若於事有未能也。結
者，結其綬不使鳴焉。疏：臣對君恆佩玉，備儀盡飾當佩玉。今云君
在不佩玉，故知非臣是世子也。○又居則設佩。注：謂所處而君不
在焉。○又朝則結佩。注：朝於君亦結左。疏亦皆謂世子。○又齊則
結結佩而爵韠。注：結屈也。結又屈之，思神靈不在事也。爵韠者，齊
服元端。疏：此謂凡應佩玉之人。○又凡帶必有佩玉，唯喪否。注：喪
主於哀，去飾也。凡謂天子以至士。○又佩玉有衝牙。注：居中央以

前後觸也。疏凡佩玉必上繫於衡，下垂二道，穿以蠙珠，下端前後以縣於璜，中央下端縣以衝牙，動則衝牙前後觸璜而爲聲，所觸之玉其形似牙，故曰衝牙。○又君子無故玉不去身，君子於玉比德焉。注謂喪與災眚。○又天子佩白玉而元組綬，公侯佩山元玉而朱組綬，大夫佩水蒼而純組綬，世子佩瑜玉而綦組綬，士佩瑞玫而緼組綬。注玉有山元水蒼者，視之文色所似也。綬者所以貫佩玉，相承受者也。純當爲緼，綦文雜色也。緼赤黃。疏瑜玉之美者，瑞玫石次玉者。

按組綬所以縣衡，上繫于革帶，衡下組綬有三條，皆以懸

玉若珠孔細非組綬可貫鄭注大戴謂琚瑀皆爲珌珠又謂是玉石其說不定後人作圖以組貫小珠未必確也

[又]孔子佩象環五寸而綦組綬[注]謙不比德亦不事也象有文理者也環取可循而無窮[疏]孔子以象牙爲環廣五寸以綦組爲綬也所以然者失魯司寇故謙不復佩德佩及事佩示己無德事也象牙有文理言己有文章也爲環者示己文教所循環無窮也五寸法五行也

按論語言去喪無所不佩則瑞玫之玉觸燧之屬皆當佩之矣佩象環在去魯之後或當如疏說

鄭風知子之來之雜佩以贈之注雜佩者珩璜琚瑀衝牙之類疏

珩佩上玉也璜半璧也琚佩玉名也瑀玖石次玉也衝牙亦玉爲

之其狀如牙以衝突前後也

集傳左右佩玉上橫曰珩下繫曰組貫以璜珠中組之貫一大珠曰瑀末

懸一玉兩端皆銳曰衝牙兩旁組半各懸一玉長博而方曰琚共
末各懸一玉如半璧而內向曰璜又以兩組貫珠上繫珩兩端下
交貫於瑀而下繫於兩璜行則衝牙觸璜而有聲也按瑀當是玉

○內則子事父母左右佩用左

佩紛悅刀礪小觶金燧右佩玦捍管遶

音逝

大觶木燧注必佩者備

尊者使令也紛悅拭物之佩巾也刀礪小刀及礪礪也小觶解小

結也觶貌如錐以象骨爲之金燧可以取火於日捍謂拾也言可

以捍彊也管筆彊也遶刀鞞也木燧鑽火也○曲禮立則磬折垂

佩主佩倚則臣佩垂主佩垂則臣佩委注君臣俛仰之節倚謂附於身小俛則垂大俯則委於地疏帶佩於兩邊臣則身宜僂折如磬之背佩從兩邊出懸垂於前主君若重慎折身而佩垂則臣彌曲故佩委於地此謂執玉幣授受之時

齊衰凶服考

喪服記凡衰外削幅裳內削幅幅三衻音若齊音裳內衰外負廣

出於適寸適博四寸出於衰衰長六寸博四寸注削猶殺也大古冠布衣布先知為上外殺其幅以便體也後知為下內殺其幅稍有飾也後世聖人易之以此為喪服衻者謂辟兩側空中央也祭

服朝服辟積無數凡裳前三幅後四幅也齊緝也凡五服之衰一斬四緝緝裳者內展之緝衰者外展之負在背上者也適辟領也負出於辟領外旁一寸博廣也辟領廣四寸則與闊中八寸也兩之爲尺六寸也出於衰者旁出衰不著寸數者可知也衰長六寸博四寸廣衰當心也前有衰後有負版左右有辟領孝子哀戚無所不在

按五服一斬四齊第言見齊衰者舉齊以兼斬也凶服者式之則五服皆然

三年問三年之喪何也曰稱情而立文因以飾羣別親疏貴賤之

節而弗可損益也故曰無易之道也創

音

鉅者其日久病甚者其

愈遲三年者稱情而立文所以爲至痛極也斬衰苴杖

以牡麻爲經以竹爲

杖

居倚廬食粥寢苦

草

枕塊

土

所以爲至痛節也○問傳斬衰何

以服苴苴者惡貌也

黎黑之色

所以首其內而見諸外也斬衰貌若苴

齊衰貌若泉

泉

大功貌若止

平停不動

小功總麻容貌可也此哀之發

於容體者也斬衰三升齊衰四升五升六升大功七升八升九升

小功十升十一升十二升總麻十五升去其半有事其縷無事其

布曰總此哀之發於衣服者也

衣服餘事

表記子曰君子服其服則文以君子之容有其容則文以君子之辭遂其辭則實以君子之德是故君子恥服其服而無其容恥有其容而無其辭恥有其辭而無其德恥有其德而無其行是故君子衰絰則有哀色端冕則有敬色甲冑則有不可辱之色詩云彼記之子不稱其服○家語哀公問曰紳委章甫有益於仁乎孔子作色而對曰君胡然焉衰麻苴杖者志不存乎樂非耳弗聞服使然也黼黻袞冕者容不褻慢非性矜莊服使然也介冑執戈者無退懦之氣非體純猛服使然也○又孔子對哀公曰生今之世志古之道君今之俗服古之服舍此而爲非者不亦鮮乎曰然則章

南絢履

絢履頭之飾

紳帶摺笏者皆賢人也孔子曰不必然也夫端衣

元裳

齋服也

冕而乘軒者則志不在於食葷斬衰菅菲

草履

杖而歆粥

者則志不在酒肉生今之世志古之道居今之俗服古之服謂此

類也○學記不學雜服不能安禮注雜服冕服皮弁之屬○少儀

衣服在躬而不知其名爲罔注罔猶罔罔無知貌○左傳鄭子臧

出奔宋好聚鵠冠

鵠冠橘反翠鳥

鄭伯聞而惡之使盜殺之君子曰服之

不衷身之災也詩曰彼己之子不稱其服子臧之服不稱也夫詩

曰自詒伊戚其子臧之謂乎注聚鵠羽以爲冠非法之服

鄉黨圖考卷之六

終

鄉黨圖考卷之七

新安江 永慎修著

及門諸子編次

飲食

始爲飲食考

禮運昔者先王未有火化，食草木之實，鳥獸之肉，飲其血，茹其毛，
後聖有作，然後脩火之利，范金合土，以炮以燔，以亨以炙，以爲醴
酪，以養生送死，以事鬼神上帝，皆從其朔。**注**未有火化，食腥也。范

金鑄作器用合土瓦甌甓及甗犬炮裹燒之也燔加於火上亨煮之鑊也炙貫之火上醴酪烝釀之也酪酢醢朔初也○又夫禮之初始諸飲食其燔黍捭豚汙尊而抔飲蕢桴而土鼓猶若可以致其敬於鬼神注中古未有釜甌釋米捭肉加於燒石之上而食之汙尊鑿地爲尊也抔飲手掬之也蕢讀爲山音塊謂搏土爲桴也土鼓築土爲鼓譙周古史考云燧人氏鑽火始裹肉而燔之曰炮神農時食穀加米於燒石之上而食之黃帝時有釜甌飲食之道始備○易包犧氏作結繩而爲罔罟以佃以漁蓋取諸離包犧

氏沒神農氏作斲木爲耜揉木爲耒耨之利以教天下蓋取諸益斷木爲杵掘地爲臼臼杵之利萬民以濟蓋取諸小過先火先炊見祭

食考又四方猶有不火食粒食者王制云東方曰夷南方曰蠻有不火食者矣西方曰戎北方曰狄有不粒食者矣注云不火食地氣煖不爲病不粒食地氣寒少五穀

通考食味調和

禮運五味六和十二食還相爲質也注五味酸苦辛鹹甘也和之者春多酸夏多苦秋多辛冬多鹹皆有滑甘是謂六和疏每時三月雖同大總放之有十二月之異○洪範水曰潤下火曰炎上木曰曲直金曰從革土爰稼穡潤下作鹹炎上作苦曲直作酸從革作辛稼穡作甘○天官食醫凡食齊才細反量也量也眠春時羹齊眠夏時醬齊眠秋時飲齊眠冬時注飯宜溫羹宜熱醬宜涼飲宜寒內則同

○又凡和春多酸夏多苦秋多辛冬多鹹調以滑甘內則注各尚

其時味而甘以成之猶水火金木之載於土疏五行土為尊五味

甘為上故甘總調四味滑者通利往來亦所以調和四味內則注

多其時味以養氣也疏依經方春不食酸四時各減其時味謂時

氣壯者減其時味以殺盛氣此經所云食以養人恐氣虛羸故多

其時味以養氣○又凡會膳食之宜牛宜稌羊宜黍豕宜稷犬宜

梁鴈宜麥魚宜苽內則注會成也謂其味相成稌稷也爾雅曰稌

稻苽彫胡也○又凡君子之食常放焉疏以王為主大夫以上亦

依之○內則春宜羔豚膳膏薌夏宜腍音鱠膳膏臊秋宜犢麝

膳膏腥冬宜鮮羽膳膏羶天官庖人同宜作○又饘醢音移酒醢音毛

羹菽麥蕡音墳稻黍梁稊音述唯所欲父母舅姑所欲○注醢音粥也音芼菜也音蕡音熬

臯實音疏音饘粥之厚者○又棗栗飴蜜以甘之音謹莖音九音粉音焚音榆

兔音薹音苦老音滌音思音酒音髓音以滑之脂膏以膏音告音之父母舅姑必嘗

之而後退○注謂用調和飲食也莖莖類也冬用莖夏用莖榆白曰

粉兔新生者薹乾也秦人澠曰滌齊人滑曰澠○疏兔薹文承莖莖

粉榆之下據莖莖等爲兔薹相和滌髓之令柔滑也○天官內饔

掌王及后世子膳羞之割亨煎和之事辨體名肉物辨百品味之

物選百羞醬物珍物以俟饋○注割肆解肉也亨煮也煎和齊以五

味體名。脊脅肩臂臑之屬。肉物。載燔之屬。百品味。庶羞之屬。疏少牢解羊豕。前體肩臂臑。後體膊骼。又有正脊。脰脊。橫脊。又有短脅。正脅代脅。是其體十一體。○樂記食饗之禮。非致味也。大饗之禮。尚元酒而俎腥魚。大羹不和。有遺味者矣。注大饗。祫祭先王。當是侯以腥魚爲俎。實不臑孰之。大羹。肉滫。不和以鹽菜。遺。猶餘也。○郊特牲。酒醴之美。元酒。明水之尚。貴五味之本也。醯醢之美。而煎鹽之尚。貴天產也。注明水。司烜以陰鑑所取於月之水也。○左傳晏子曰。和如羹焉。水火醯醢鹽梅。以烹魚肉。燂之以薪。宰夫和之。齊之以味。濟其不及。以洩其過。君子食之以平其心。注燂。炊也。陸

也燃齊益也齊謂多洩減也少之量

饌考

曲禮凡進食之禮左殽右載食居人之左羹居人之右注皆便食也殽骨體也載切肉也食飯屬也居人左右明其近也殽在俎載在豆疏此明卿大夫與客燕食之禮熟肉帶骨而饗曰殽純肉切之曰載骨是陽故在左肉是陰故在右食飯燥爲陽故居左羹溼是陰故居右皆在殽載之內春秋宣十六年王享士會殽烝下云宴有折俎又昏禮及特牲少牢皆骨體在俎公食大夫禮庶羞十

六豆有牛載羊載是載在豆○又膾炙處外醯醬處內注殽載之

外內也。近醯醬者食之主。膾炙皆在豆。疏此醯醬。徐音海。則醯之
與醬。兩物各別。依昏禮及公食大夫禮。醬在右。醯在左。此醯醬處
內。亦當醬在右。醯在左也。公食禮。宰夫自東房授醯醬。公設之。注
云。以醯和醬也。又周禮醯人祭祀共齊菹醯物。則醯醬共爲一物
也。○又蔥漆。音齋處末。注漆。烝蔥也。處醯醬之左。言末者。殊加也。漆
在豆。疏儀禮正饌。唯有菹醯。無蔥漆。故知蔥漆爲殊加。○又酒漿
處右。注處羹之右。此言若酒若漿耳。兩有之。則左酒右漿。此大夫
士與賓客燕食之禮。其禮食則當放公食大夫禮云。○又以脯脩
置者。左胸右末。注亦便食也。屈中曰。胸。疏脯脩。設食竟所須也。末。

反思呂 稷側角 反
〔注〕飯目諸飯也。熟穫曰稭。生穫曰稊。黍黃黍也。〔疏〕玉

稊○
反側角

〔注〕飯目諸飯也。熟穫曰稭。生穫曰稊。黍黃黍也。〔疏〕玉

藻諸侯朔食四簋、黍稷稻粱、天子則加以麥苽爲六。○**𩇑**𩇑音香

藻諸侯朔食四簋黍稷稻粱天子則加以麥苽爲六〇

又膳鄉香音

曉 韻

臄音曉 牛炙音黠 醢音 牛炙 醢 牛臄 羊炙 羊臄 醢 醢 豕炙 醢 豕臄 豕臄 芥醬 魚

膾雉兔鶉鴝注此上大夫之禮庶羞二十豆也

臠牛
 臠豕
 臠羊



反力

醢而茹食雉羹麥食脯羹雞羹折稌犬羹兔羹和糝不

食。日諸食也。苽。彫胡也。稌。稻也。凡羹齊宜五味之和。米屑之。

糝
糝則不

否音

糝。蓼則不音否矣。此脯所謂析乾半羊肉也。疏此明人君燕食所用。

以蝸爲醢。以苽米爲飯。以雉爲羹。三者味相宜。以麥爲飯。析脯爲

羹又以雞爲羹此三者亦味相宜細折稻米爲飯以犬兔爲羹三

者亦味相宜○又濡音而豚包苦實蓼濡雞醢醬實蓼濡魚卵音鯢醬

實蓼濡鼈醢醬實蓼注凡濡謂亨煮之以汁和也苦苦茶也以包

豚殺其氣卵讀爲鯢魚子也疏實蓼謂實於其腹中又縫合之○

又暇脩蚺醢注暇脩捶脯施薑桂也蚺蚺蜉子也○又脯羹

兔醢麋膚魚醢魚膾芥醬麋腥醢醬桃諸梅諸卵鹽注自蝸醢至

此一十六物似皆人君燕所食也其饌則亂膚切肉也卵鹽大鹽

也○又牛脩鹿脯田豕脯麋脯麇脯麋鹿田豕麇皆有軒音憲雉兔

皆有芼爵鷄蜩范芝栭葢椹棗栗榛柿瓜桃李梅杏楂梨薑桂注

脯皆析乾肉也。軒讀爲憲，憲謂藿菜切之也。芼，謂菜釀也。蜩、蟬也。范，蜂也。蔞，芰也。枳，枳棋也。楂，梨之不臧者。自牛脩至此三十一物，皆人君燕食所加庶羞也。周禮天子羞用百有二十品，記者不能次錄。**疏**：芝栭，一物也。○**又**：膾，春用蔥，秋用芥，豚春用韭，秋用蓼。脂用蔥，膏用音藪，三牲用音藪，音和用醯，獸用梅，鶉羹雞羹鴛釀之蓼。魴、鰾、烝、雛、燒雉、薺，無蓼。**注**：芥，芥醬也。脂，肥凝者。釋者曰：膏，藪煎菜莢也。和用醯，畜與家物自相和。獸用梅，亦野物自相和。釀，謂切雜之也。駕，烝之不羹也。薺，蘇荏之屬也。燒，煙於火中也。自膾用蔥至此，言調和菜釀之所宜也。○**又**：肉腥，細者爲膾，大者爲軒。音**注**：言

大切細切異名也。膾者必先軒之。所謂聶而切之也。○又或曰麋鹿魚爲菹。麇爲辟雞。野豕爲軒。兔爲宛脾。切蔥若薤。實諸醢以柔之。注此軒辟雞宛脾皆菹類也。釀菜而柔之以醢。殺腥肉及其氣。菹軒聶而不切。辟雞宛脾聶而切之。○王制五十異糗。六十宿肉。七十貳膳。八十常珍。九十飲食不離寢。膳飲從於遊可也。注糗糧也。貳副也。遊謂出入遊觀。○內則羹食自諸侯以下。至於庶人無等。大夫無秩膳。大夫七十而有閣。天子之閣左達五。右達五。公侯伯於房中。五大夫於閣三。士於坵一。注羹食食之主也。庶羞亦異耳。無秩膳謂五十始命。未甚老也。秩常也。七十有秩膳也。閣以板。

爲之。度食物也。達夾室。大夫言於閣。與天子同處。天子二五倍諸侯也。五者。三牲之肉及魚腊也。疏宮室之制。中央爲正室。左右爲房。房外有序。序外有夾室。天子尊庖廚遠。諸侯庖廚宜稍近。大夫卑無嫌。故亦於夾室而閣。三者豕魚腊也。士卑不得作閣。但於室中爲土玷度食也。○又淳音淳熬煎醢加於陸稻上。沃之以膏。曰淳熬。注淳沃也。熬亦煎也。沃煎成之爲名。此八珍之一○又淳母音模煎醢加於黍食上。沃之以膏。曰淳母。注母讀曰模。模象也。作此象淳熬。八珍之二又炮取豚若將音并剗之。剗之。實棗於其腹中。編萑以苴之。塗之以謹塗。炮之。塗皆乾。擘之。濯手以摩之。去其皽。爲稻粉糲洑。

之以爲醢。以付豚。煎諸膏。膏必滅之。鉅鑊湯以小鼎。薺脯於其中。使其湯毋滅鼎。三日三夜毋絕火。而後調之以醢醢。注炮者以塗燒之爲名也。將當爲牂。牂牡羊也。謹當爲瑾。瑾塗塗有穰草也。鰾謂皮肉之上魄莫也。糴讀與滫瀡之滫同。薺脯謂煮豚若羊於小鼎中。使之香美也。豚羊入鼎三日。乃內醢醢可食也。炮豚炮牂八珍之三四

又擣珍。取牛羊麋鹿麇之肉。必脰。每音每每物與牛若一。捶反側之。去

其餌。孰出之。去其鬴。柔其肉。注脰脊側肉也。捶擣之也。餌筋腱也。

柔之爲汁和也。汁和亦醢醢。此八珍之五又漬。取牛肉必新殺者。

薄切之。必絕其理。湛音尖諸美酒。期朝而食之。以醢若醢醢。注湛亦

漬也醢梅醬此八珍之六

○又為熬捶之去其馑編萑布牛肉焉屑桂

皆如羊

與薑以洒諸上而鹽之乾而食之施羊亦如之施麋施鹿施麇欲

濡肉則釋而煎之以醢欲乾肉則捶而食之注熬於火上為之也

此八珍之七

○又肝膋取狗肝一幪之以其膋濡炙之舉焦其膋不蓼

注膋腸間脂此八珍之八

○天雅韓侯出祖出宿于屠顯父餞之清酒

百壺其殽維何魚鼈鮮魚其藪維何維筍及蒲蘆豆有且侯氏燕

胥傳藪菜殽也箋魚鼈以火熟之也筍竹萌也蒲深蒲也且多貌

○小雅吉甫燕喜既多受祉來歸自鎬我行永久飲御諸友魚鼈

膾鯉

米精粗考

大雅彼疏斯粃箋云疏麤也謂糲米也米之率糲十粃九鑿八侍

御七疏其術在九章粟米之法彼云粟率五十糲米三十粃二十

七鑿二十四御二十一言粟五升為糲米三升以下則米漸細故

數益少四種之米皆以三約之得此數也

說文以糲米一斛舂九斗曰鑿舂八斗曰粃與

此異字林糲米一斛舂八斗曰鑿

食考飯一也

食醫會膳食之宜

見食味調和條

內則飯品及庶食麥食折稌八珍淳熬

淳母

俱見饌考條

曲禮

食居人左王制五十異糧

俱見饌考條

○大雅或舂

或揄或簸或蹂釋之叟叟所畱反烝之浮浮傳揄杼曰也或簸糠者

或蹂黍者集傳云蹂禾取穀以繼之也釋淝米也叟叟聲也浮浮氣也疏杼曰

杼米以出曰也○又洞酌彼行潦挹彼注兹可以饣饎傳洞遠也

行潦流潦也饣饎集傳云烝米一熟而饎酒食也○小雅有饎

簋殮有捄棘傳饎滿簋貌殮熟食謂黍稷也捄長貌長而曲貌匕所

以載鼎寶棘赤心也

按古人禮食以簋盛飯尊卑之差有八簋六簋四簋二簋

儀禮又謂之敦音對所盛者黍稷加之則稻粱天子又加麥

苽其非禮食則盛之於簞以匕出之食飯於豆其匕又謂

之挾札管子弟子職篇云左執虛豆右執挾札周旋而貳唯噍之視同噍以齒是謂貳紀此謂弟子侍長者數人食飯從旁益飯之禮匕是盛飯入豆非載鼎寶之匕

曲禮其飯揚飯搏飯

俱見後食禮考條

饘餲考

爾雅餲

呼蓋切

謂之饘

許穢切

[注]說物臭也○

[又]食饘謂之饘

[注]飯穢

臭

按爾雅合饘餲爲一別有餲饘爲物臭說文以饘爲飯傷溼以饘爲飯傷熱集註合飯傷熱溼解饘本字林而以餲

爲味變。此爲定詁。味變則氣亦變。今謂之餽飯是也。飯傷熱溼者。水火不得宜。氣味變者。陳久所致。

肉考

周禮體名肉物

見食味調和條

曲禮左殽右截。內則濡豚及用韭用蓼。用

藪八珍之炮豚。炮牂。擣漬熬肝。骨

俱見饌考條

○王制諸侯無故不殺

牛。大夫無故不殺羊。士無故不殺犬豕。庶人無故不食珍。注故謂

祭饗。疏周公制禮。天子日食犬牢。則諸侯日食少牢。大夫日食特

牲。士日食特豚。玉藻云。天子日食少牢。朔月犬牢。諸侯日食特牲。

朔月少牢。則知大夫日食特豚。朔月特牲。士朔月特豚。是常食有

限不得踰越諸侯祭以犬牢得殺牛大夫祭以少牢得殺羊天子

大夫祭亦得殺牛諸侯及大夫饗食得用牛○**內則**士不貳羹馾○

疏謂士燕食也若朝夕常食則下云羹食自諸侯以下至於庶人

無等○**小雅**既有肥羜以速諸父既有肥牡以速諸舅**傳**羜未成

羊也也牡牛○**大雅**醯醢以薦或燔或炙嘉穀脾臠**傳**以肉曰醢醢

箋薦之禮非菹則醢醢也燔用肉炙用肝以脾函為加**疏**口上曰

臠口下曰函○**易**噬嗑六二噬膚六三噬腊肉遇毒九四噬乾肺

六五噬乾肉本義祭有膚鼎肉之柔脆噬而易噉者腊肉謂獸腊全體骨而為之者堅韌之物也肺肉之帶骨者噬乾

肉難於膚而易於腊肺者也○**內則**肉曰脫之**疏**皇氏云治肉去其筋膜取好

處李巡注爾雅云肉去其骨曰脫郭云剝其皮也○曲禮齒決不

齒決

見後食禮考條

按肉出於牛羊豕犬雞及鳥獸烹之於鑊盛之於鼎載之於俎與豆又有土包而燒之者為魚加於火上者為燔貫而炙之為炙乾於火上為熬腥肉細切而以醢醢食之曰膾薄析乾之曰脯加薑桂治之曰脩肉醬曰醢肉汁曰滷

割肉考

少牢饋食禮牢心舌載于肝音祁俎心皆安下切上午割勿沒舌皆

切本末亦午割勿沒注牢羊豕也安平也凡割本末食必正也午

義廷華云為下切本使平也切本切末之

割使可絕。勿沒爲其分散也。所之爲言敬也。所以敬尸也。疏鄉黨
孔子云割不正不食。故割本末爲食正也。特牲篇注午割從橫割之
○少儀牛
羊之肺離而不提心。注提猶絕也。剗離之不絕中央少者使易絕
以祭耳。疏謂祭肺法也。心謂肺中央少許者。

按割肉之法引此二條以見凡割切皆當有法。肉體亦有
不能盡割以正者。聖人唯食其正者耳。邢疏謂析解牲體
脊脅臂臠之屬。禮有正數者。若解割不得其正則不食也。
按此祭饗之割自當有法。此所記謂常食之割也。

魚考

內則魚曰作之作爾雅爾雅注謂削鱗也○天官音人辨魚物

為麤蕘以其王之膳羞注鮮生也蕘乾也○爾雅魚謂之鮓音耶注

鮓屬也見公食大夫禮○少儀羞濡魚者進尾注擗之由後鮓肉

易離也○又冬右腴夏右音祈祭音臘呼注冬氣在下腴腹下也夏

氣在上鰭脊也膾大臠謂剝魚腹也疏此皆謂尋常燕食所進魚

體○內則魚膾芥醬見前饌又魚去乙見後不食考條

餒敗考

爾雅肉謂之敗魚謂之餒注敗臭壞餒肉爛疏公羊傳梁亡自亡

也魚爛而亡也注百姓相率俱去狀若魚爛魚爛從內發○左傳

叔展曰、河魚腹疾、奈何、注言無禦溼藥將病

膾考

少儀牛與羊魚之腥、聶而切之爲膾麋鹿爲菹、野豕爲軒、音憲皆聶

而不切、麇爲辟雞、兔爲宛脾、皆聶而切之、切蔥若薤、實之醯以柔

之、注聶之言牒也先藿葉切之、復報切之、則成膾、此軒辟雞宛脾

皆菹類也、其作之狀、以醯與葷菜淹之、殺肉及腥氣也、疏聶而切

之、謂先牒爲大臠、而後細切之爲膾也、辟雞宛脾及軒之名、其義

未聞、或用蔥、或用薤、置諸醋中、悉皆濡熟、故云柔之、膾亦當用蔥薤置諸醋中

○丙則大夫燕食有膾、無脯、有脯無膾、○丙則牛膾、魚膾、及用蔥

用芥俱見前
饌考條

按膾以牛羊魚之腥肉細切以醢殺其腥氣食時用芥醬及蔥同食之火上炙之者為炙

脯考

天官腊人掌乾肉凡田獸之脯腊臠胖之事注大物肆解乾之謂之乾肉薄析曰脯捶之而施薑桂曰臠脩腊小物全乾○**檀弓**古者大夫束脩之間不出竟音境○**曲禮**左胸右末○**內則**牛脩鹿脯

田豕脯麋脯麇脯及臠脩蜆醢俱見前
饌考條有脯無膾見前膾
考條

羹考

卷八

王氏注云：羊、豕、牛、菜、牛、

天官亨人祭祀其大羹鉶羹。賓客亦如之。注大羹肉清，大羹不致五味，鉶羹加鹽菜矣。疏大羹肉清盛於登，謂大古之羹不調以鹽菜及五味，調鑊中煮肉汁，一名清，云鉶羹者皆是陪鼎，腳臠臠牛用藿，羊用苦，豕用薇，調以五味盛之於鉶器，即謂之鉶羹。若盛之於豆，即謂之庶羞。禮器有以素為貴者。大羹不和。郊特牲大羹不和，貴其質也。左傳大羹不致，昭其儉也。公食大夫記鉶芼牛藿，羊苦，豕薇，皆有滑。注藿，豆漿，苦，苦茶，滑，莖苴之類。說命若作和羹，爾惟鹽梅。曲禮羹之有菜者用桮。音莢其無菜者不用桮。注桮猶箸也。疏有菜者為鉶羹，以其有菜交橫，非桮不可，無菜

者謂大羹滂也。直歆之而已。其有肉調者。犬羹兔羹之屬。或當用

匕也。○**內則**芼羹食醬。羹齊視夏時。**左傳**和如羹。俱見食味調和條**曲禮**

羹居人右。**內則**雉羹。脯羹。犬羹。兔羹。鶉羹。及羹食無等。士不貳羹。

載。俱見饌考條**嚶羹絮羹**俱見後食禮考條

按爾雅肉謂之羹。羹為煮肉之通名。肉熟為羹。定是也。但

有肉汁而不和鹽菜。盛之瓦豆之登者。為大羹。三牲肉汁。

和以鹽菜。盛之銅器者。為鉶羹。列之鼎者。為陪鼎。皆禮食。

之羹。其常食之羹。雞犬兔及脯。皆和米屑作之。而不用蓼。

又有菜羹。但有鹽菜。內則所謂芼羹。藟苴葵薇之類。皆可。

作之其尤儉者王褒所謂羹藜司馬遷傳所謂藜藿之羹者也

醬考

天官膳夫凡王之饋醬用百有二十甔注醬謂醢醢也王舉則醢

人其醢六十甔以五甔七醢七菹三醢奴兮反實之醢人其甔菹醢

物六十甔疏醬是總名知醬中兼有醢醢者經云百有二十甔醢

人其醢六十甔醢人其醢物六十甔故並引之又醢人注五甔昌

本脾析蜃豚拍深蒲也七醢醢羸羸音排池音池魚兔鴈醢七菹韭菁

茆葵芹筴音筴筍菹三醢麋鹿麇醢也醢肉汁也三醢亦醢也有骨

膳言新廣初細切也

為齏。無骨為醢。出爾雅作醢及齏者，必先膊乾其肉，乃後莖之，雜以

梁翹及鹽，湛以美酒，塗置瓶中，百日則成矣。羸、蜺、蜎。音夷蜎，大蛤。

蚳、蚳。音蟻子，凡醢醬所和，細切為齏。全物若腍為菹。又醢人注齏菹。

醬屬醢人者，皆須醢成味。又醢人醢人，皆有女醢。女醢二十人。注

云：女奴曉醢者，曉醢者。○公食大夫禮：宰夫自東房授醢醬。公設

之。注醢醬以醢和醬，公設之，以其為饌本。疏此醢醬下，但言醬不

別言醢，明以醢和醬，可知祭祀無此法，以生人尚褻味，故有之。此醬

賓食殽時，以殽擣于醬而食之，食後賓親徹之。○玉藻：主人自置其醬，則客自徹之。注敬

主人也，徹奠於序端。○曲禮：獻熟食者操醬齊。音壘疏：齊，醬屬。齊，醬

菹通名耳熟食蔥漆之屬非也謂肉醬齊為食之主執主來則食

可知若見芥醬必知魚膾之屬○檀弓孔子哭子路於中庭既哭

進使者而問故使者曰醢之矣遂命覆醢注覆棄之不忍食○天

官醬齊視秋時見食味調和條內則濡雞醢醬濡魚卵醬濡鼈醢醬股脩

蚺醢脯羹兔醢麋膚魚醢又有蜋醢魚膾芥醬麋腥醢醬膾秋用

芥三牲和用醢俱見饌考條曲禮醢醬處內見饌考條醢醢見後食禮考條

按醬者醢醢之總名醢之物有七醢醢當是豕肉作之家

所常用者也又陸產之物有蚺兔鴈水產之物有蜋麋魚

或間有之未必皆備內則有卵醬亦魚醢之類有芥醬則

孟云金和若膳凡和細切者醢有骨者醢骨有醢多汁者醢醢之醢之醢之時也

醯人七菹之類。漬諸醯而成者也。醬物以醢醢爲主。或於烹魚肉時以醬和之。濡雞濡鼈醢醬。濡魚卵醬是也。或於食魚肉膾脯時以醬配之。膾脩蜆醢。脯羹兔醢。麋膚魚醢。魚膾芥醬。麋腥醢醬是也。凡稱醢醬或單言醢者。醢醢也。言醢醬者。以醢和醬也。濡豚不用醬。而三牲和用醢。日食豕肉爲多。則當設醢也。用梅漿作之者爲醢。醢醢主酸醢。主鹹。公食禮凡炙無醬。注云已有鹹和是也。不得其醬。當是配食之醬。若烹物時已入醬。或有非其醬亦難辨。聖人當不苟求至此。卽配食之醬亦不必盡如內則如當用醢。

而設醯。當用醯而設醯，亦是不得其醬，不得或是家中偶
乏，或進食時忘設，皆子婦之過。聖人以不食者教之，家人
自知之後，皆當藏之以待乏，食時亦不至忘設矣。

色惡臭惡考

天官內饔辨腥臊羶香之不可食者。牛夜鳴則廋。音羊泠音零毛而

羶羶。犬赤股而躁，臊。烏鰾色而沙鳴，狸。音鬱內豕盲音亡眡內則作望視

而交睫腥。馬黑脊而般臂，蠛。音樓內則作漏注腥臊羶香可食者，是別其

不可食者，則所謂者皆臭味也。廋，朽木臭也。內則注廋，惡臭也。春

泠，毛毛長總結也。內則注羶，毛別聚於不解者也。赤股，股裏無毛也。以內則羶失注補。

色不澤美也

內則注鰾色毛變色也

沙澌也

內則注猶澌也

鬱腐臭也

以內則注補

盲眊

當為望視。惺當為星。肉有如米者似星。

按腥謂其氣腥

般臂。臂毛有文。

內則

注臂前脛般般然也

蠖蠖蛄臭也

內則注漏當為蠖蠖蛄臭也

按邢疏色惡臭惡謂飯食及肉顏色香臭變惡者飯之色

臭惡已在餲中矣米之紅朽國語所謂赤米者亦是色惡

詩云魴魚頰尾魚勞則尾赤亦是色惡鮑魚之肆亦是臭

惡凡物久而敗者色不鮮且有臭也又月令春其臭羶夏

其臭焦中央土其臭香秋其臭腥冬其臭朽此五臭之正

者庖人注腥謂雞臊謂犬羶謂羊香謂牛此本氣非惡者

可食。

失飪考

論語失飪不食。注孔曰失飪失生熟之節。○爾雅搏者謂之糲。音

米者謂之粦。音伯注糲飯相著。粦飯中有腥。疏飯淖糜相著也。米飯

半腥半熟名粦。即論語云失飪不食。

按說文飪大熟也。失飪有過熟有不熟。不熟者尤害人也。

爾雅唯言飯之失飪。肉物亦有之。肉之過熟者亦為糜爛。

半熟半腥者謂之糲。祭禮腥法上古糲法中古熟之為臠。

進後世之食若生人之食不可不熟也。膾與麋腥之類用

半腥半熟名粦。即論語云失飪不食。
注孔曰失飪失生熟之節。
○爾雅搏者謂之糲。
音伯注糲飯相著。粦飯中有腥。
疏飯淖糜相著也。米飯

腥者有蔥薤及醯以柔之。有醬以和之也。

不時考

王制五穀不時。果實未孰。不粥於市。注物未成。不利於人。

按穀果菜之時。若月令孟夏農乃登麥。麥秋至。王瓜生。苦

菜秀。仲夏農乃登黍。天子乃以雛嘗黍。羞以含桃。櫻桃先薦

寢廟。孟秋農乃登穀。天子嘗新。先薦寢廟。仲秋天子以犬

嘗麻。先薦寢廟是也。又夏小正二月采檠。五月煮梅。六月

煮桃。皆爲豆實也。民之食以時。若豳風六月食鬱及薁。七

月烹葵及菽。八月剝棗。十月穫稻。爲此春酒。以介眉壽。七

月食瓜。八月斷壺。九月叔苴。采荼薪樗。食我農夫是也。其有不時者。或問引胡氏說云。漢詔所謂穿掘萌芽。鬱養強熟之類。

薑考

論語不徹薑食。注孔氏曰。撤去也。齊禁葷物。薑辛而不臭。故不去。
○本草薑久服通神明。○說文薑。禦溼菜。○檀弓曾子曰。喪有疾。食肉飲酒。必有草木之滋焉。以爲薑桂之謂也。○內則薑桂爲熬。屑桂與薑。俱見饌考條。
○玉藻膳於君有葷。注葷。薑及辛菜也。

果實考

內則棗曰新之栗曰撰之桃曰膽之粗梨曰攢之注皆治擇之名

○韓非子孔子御坐於哀公公賜之桃與黍孔子先飯黍後啗桃

公曰黍者非飯之也以雪桃也對曰君子以賤雪貴不聞以貴雪

賤今以五穀之長雪果蓏之下以為妨義故不敢也雪洗○內則芝

栴等見饌考條

不食考不食之外又有見禮經者補此

內則不食雛黿狼去腸狗去腎狸去正脊兔去尻狐去首豚去腦

魚去乙黿去醜注皆為不利人也雛黿伏乳者乙魚體中害人者

也醜謂黿竅也一說魚腸謂之乙見爾雅○又雛尾不盈握弗食舒鴈翠鵠鵙

肝舒鳧翠。雞肝鴈腎。鵠與鹿胃。注亦皆爲不利人也。舒鴈鵠也。翠尾肉也。鵠鵠肝。謂脅側薄肉也。舒鳧鵠也。鵠與脾胝也。○少儀君
子不食圉腴。注周禮圉作豢。謂犬豕之屬食米穀者也。腴有似人
穢。禮牛羊有腸胃。鼎犬豕無

食禮考

曲禮共食不飽。注謙也。謂共羹飯之大器也。疏共食宜謙。不輒厭
飫爲飽也。○又共飯不澤手。注爲汙手不絜也。澤謂接莎也。禮飯
以手。疏古禮飯不用箸。但用手。既與人共飯。手宜絜淨。不得臨食
始接莎手。恐爲人穢。○又毋搏飯。注爲欲致飽。不謙。疏取飯作搏。

則易得多。○**又**母放飯。**注**去手餘飯於器中人所穢。朱子云大飯也。○**又**

母流歔。**注**大歔嫌欲疾。朱子云長歔也。○**又**母吃食。**注**嫌薄之。**疏**謂以舌

口中作聲似嫌主人之食。○**又**母齧骨。**注**為有聲響不敬。○**又**母

反魚肉。**注**為已歷口人所穢。○**又**母投與狗骨。**注**為其賤飲食之

物。○**又**母固獲。**注**為其不廉也。欲專之曰固。爭取曰獲。○**又**母揚

飯。飯黍母以箸。母嚙。音美。**注**亦嫌欲疾也。嚙為不嚼菜。**疏**揚飯。揚

去熱氣也。母以箸常用匕。今按箸即挾匕也。母以箸當用手。羹有菜者用挾。故不

得歔。當挾嚼也。○**又**母絮。勑慮反。羹。**注**為其詳於味也。絮猶調也。**疏**

絮謂就食器中調足鹽梅也。若得主人羹更於器中調和是嫌主

人味惡也。○又母刺齒。注爲其弄口也。口容止。○又母歆醢。注亦

嫌詳於味也。歆者爲其淡故。疏醢肉醬也。○又客絮羹。主人辭不

能亨。客歆醢。主人辭以簋。注優賓。○又濡肉齒決。乾肉不齒決。注

決猶斷也。堅宜用手。○又母噉。楚怪反。炙。注爲其貪食甚也。噉謂一舉

盡齏。○又卒食。客自前跪徹飯齊。音躋。以授相者。注謙也。自從也。齊

醬屬也。相者。主人贊饌者。公食大夫禮。賓卒食。北面取梁與醬以

降也。○又主人興辭於客。然後客坐。注不聽親徹。○又客若降等

執食興辭。主人興辭於客。然後客坐。注辭者。辭主人之臨已食。若

欲食於堂下然。○又主人延客祭。祭食。祭所先進。殺之序。徧祭之。

〔注〕延，道也。祭祭先也。君子有事不忘本也。客若降等，則先祭。主人所先進，先祭之。所後進，後祭之。如其次，徧祭，謂馘炙膾也。以其本出於牲體也。〔疏〕君子不忘本，有德必酬之，故得食而種種出少許，置在豆間之地，以報先代造食之人也。若敵客，則得自祭，不須主人之延道。今此卑客聽主人先祭，道之已，乃從之。○〔又〕三飯，主人延客食馘，然後辨。音徧〔注〕先食馘，後食殺，殺尊也。凡食殺，辨於肩食，肩則飽也。○〔又〕主人未辨，客不虛口。〔注〕俟主人也。虛口，謂醕也。客自敵以上，其醕不待主人飽。主人不先飽也。〔疏〕虛口，謂食竟飲酒，蕩口，使清絜，及安食也。用漿曰漱，用酒曰醕。○〔玉藻〕侍食於先

生異爵者後祭先飯注謙也疏此饌不爲己故後祭而先飯者示

爲尊者嘗食也○又客祭主人辭曰不足祭也客殮音孫主人辭以

疏注祭者盛主人之饌也殮者美主人之食也疏之言麤也疏客

殮者若食竟作三飯殮也以水澆飯○又食棗桃李弗致於核注恭也

疏謂懷核不置於地也○又瓜祭上環食中藥所操注上環頭刊

也○又凡食果實者後君子注陰陽所成非人事也○又火孰者

先君子注備火齊不得也○少儀燕侍食於君子則先飯而後已

注所以勸也○又毋放飯毋流歎小飯而亟之注亟疾也備噦噎

及見問也疏小口而飯備噦噎速咽之備見問也○又數色角反噦

子笑

毋爲口容。注口容弄口。疏數噍謂數數嚼之。反客自徹辭焉

則止。注主人辭其徹。坊記子云敬則用祭器。注祭器遵豆簋銅
之屬也。有敬事於賓客則用之。謂饗食也。盤孟之屬爲燕器。反
故君子不以菲廢禮。不以美沒禮。故食禮主人親饋則客祭。主人
不親饋則客不祭。故君子苟無禮雖美不食焉。注言不可以其薄
不及禮而不行禮亦不可以其美過禮而去禮。禮主敬廢滅之是
不敬。○玉藻孔子食於季氏不辭不食肉而殮。注以其待已及饌
非禮也。疏凡客將食興辭而孔子不辭者必是季氏進食不合禮
也。凡禮食先食馘次食殽乃至肩至肩則止乃殮不食肉而仍爲

殯者，是季氏饌失禮故也。○**雜記**孔子曰：吾食於少施氏而飽，少施氏食我以禮。吾祭作而辭曰：疏食不足祭也。吾殯作而辭曰：疏食也，不敢以傷吾子。**注**言貴其以禮待已而爲之飽也。時人倨慢，若季氏則不以禮矣。少施氏，魯惠公子施父之後。**疏**殯謂食後更殯而強飯，以答主人之意。

侍食考

論語侍食於君，君祭先飯。**注**鄭曰：於君祭則先飯矣。若爲君嘗食，然**疏**若敵客，則得先自祭，降等之客則後祭。若臣侍君而賜之食，則不祭。若賜食而君以客禮待之，則得祭。雖得祭，又先須君命之。

王延平云先飯者示先會
意以無膳宰進會也此
而侯也似在會後之意
侯君會也

祭後乃敢祭也。此言君祭先飯，則是非客之禮也。故不祭而先飯。
若爲君嘗食，然也。○玉藻：若賜之食，而君客之，則命之祭，然後祭。
先飯。辨音嘗羞飲而俟。注：雖見賓客之，猶不敢備禮也。侍食則正
不祭，飲而俟。俟，君食而後食也。君將食，臣先嘗之，忠孝也。○王相
見禮：若君賜之食，則君祭先飯，徧嘗膳，飲而俟。君命之食，然後食。
注：君祭先飯，食其前食，臣先飯，示爲君嘗食也。此謂君與之禮食。
膳謂進庶羞，既嘗庶羞，則飲。俟，君之徧嘗也。疏：凡君將食，必有膳
宰進食，則膳宰嘗君前之食，備火齊不得也。此文謂膳宰不在，則
侍食者自嘗自己前食，既不嘗君前食，則不正嘗食，故云示爲君

嘗食也。此謂君與臣小小禮食法。仍非正禮食。正禮食則公食大
夫是也。彼君前無食。此君臣俱有食。故知小小禮食。玉藻云客之
則此註禮食。但此文不云客之。命之祭然後祭。文不具也。若臣嘗
食。不得云禮食。亦不得祭。○玉藻若有嘗羞者。則俟君之食。然後
食。飯飲而俟。○注不祭。侍食不敢備禮也。不嘗羞。膳宰存也。飯飲利
將食也。○疏此謂臣侍食得賜食。而非君所客者也。○又君命之羞。
羞近者。○注辟貪味也。○又命之品嘗之。然後唯所欲。○注必先徧嘗
之。○又凡嘗遠食。必順近食。○注從近始也。○又君未覆手。不敢殮。
○注覆手以循咽。已食也。殮。勸食也。○疏食飽。必覆手以循口邊。恐有

穀粒汚著之。殮謂用飲澆飯於器中也。禮食竟更作三殮以勸飽。
○又君既食又飯殮。注不敢先君飽。○又飯殮者三飯也。注臣勸
君食如是可也。○又君既徹執飯與醬乃出授從者。注食於尊者
之前當親徹也。○曲禮賜果於君前其有核者懷其核。注嫌棄尊
者物也。○以黍雪桃事。見果實考條

按鄉黨記侍食於君是君以客禮待之者故代宰夫嘗食
客之則已當祭此不言者或是君未有命或是記者略之
邢疏謂君祭先飯則是非客之禮非也若非客之則有宰
夫嘗食夫子不得先飯矣。

賜食考

玉藻酒肉之賜弗再拜。注輕也。受重賜者拜受。又拜於其室也。疏亦謂君賜也。再拜重也。酒肉輕。但初賜至時則拜至。明日不重往拜也。

祭食考

明堂位有虞氏祭首。夏后氏祭心。殷祭肝。周祭肺。注氣主盛也。謂

肺祭。○春官大祝辨九祭。一曰命祭。二曰衍祭。三曰炮祭。四曰

周祭。五曰振祭。六曰擣而泉反祭。七曰絕祭。八曰繚了音祭。九曰共祭。

注九祭皆謂祭食者。命祭玉藻曰君若賜之食而君客之則命之

祭然後祭是也。衍當為延。曲禮曰：主人延客祭是也。炮當為包。包

猶兼也。有司曰：有司贊者取白黑以授尸，尸受兼祭於豆，祭是也。

周猶徧也。曲禮曰：殺之序徧祭之是也。振祭，擣祭本同，不食者擣

則祭之。特牲少牢未食之前以菹擣於醢祭於豆間是也。將食者既擣必振乃祭也。特牲少牢

尸取肝擣於醢振祭齊之是也。振者振動其手也。絕祭，繚祭亦本同。禮多者繚之。以手從肺本循

之至於末乃絕以禮略者絕則祭之不循其本直絕肺其猶授也。祭見鄉飲酒禮。

王祭食宰夫授祭。○玉藻唯水漿不祭。若祭為已俵。虛步卑注水反

漿非盛饌也。已猶大也。祭之為大有所畏迫。臣於君則祭之。疏言

食於體敵之人若祭水漿為大。厭降也。俵厭也。卑微有所畏迫也。臣

於君則祭之者。公食大夫禮祭觶漿是也。○〔左傳〕齊慶封來奔。叔

孫穆子食慶封。慶封汜

音泛

祭。穆子不說。使工爲之誦茅鴟。亦不知。

〔注〕禮食有祭。示有所先也。汜祭。遠散所祭。不共。茅鴟。逸詩。刺不敬。

〔疏〕公食大夫禮。取韭菹以徧濡於醢。於上豆之間祭。又言祭鉶羹

於上鉶之間。祭飲酒於上豆之間。是祭食之禮。各有其處。○少施

氏辭祭。

見食禮考條

按古人祭先代始爲飲食之人。大者如后稷配天。次者如

大蜡祭先畱司畱。其先火先炊之人。則於祭祀後祭之。夏

官司燿

音灌

凡祭祀則祭燿。祭先火也。特牲饋食禮尸卒食。

而祭饔音臠饔饔祭先炊也。先炊者老婦之祭盛於盆尊

於瓶臧文仲燔柴祭之謂是祭火神孔子以爲非禮至每食必祭亦是祭先火先炊彼是正祭此是小祀耳

變食考

莊子不飲酒不茹葷此祭祀之齊

按士相見禮膳葷注謂食之葷辛物蔥薤之屬玉藻注葷薑及辛物不徹薑食孔注齊禁葷物薑辛而不臭故不去然則葷辛物謂蔥韭薤也

祭肉考

祭統凡爲俎者以骨爲主骨有貴賤殷人貴髀周人貴肩凡前貴於後俎者所以明祭之必有惠也是故貴者取貴骨賤者取賤骨貴者不重平聲賤者不虛示均也惠均則政行政行則事成事成則

功立功之所以立者不可不知也俎者所以明惠之必均也善爲政者如此故曰見政事之均焉注殷人貴髀爲其厚也周人貴肩

爲其顯也凡前貴於後謂脊脅臂臠之屬又夫祭有畀音輝音胞

音翟音闇者惠下之道也唯有德之君爲能行此明足以見之仁足

以與之畀之爲言與也能以其餘畀其下者也輝者甲吏之賤者也胞者肉吏之賤者也翟者樂吏之賤者也闇者守門之賤者也

此四守者，吏之至賤者也。尸又至尊，以至尊既祭之末，而不忘至賤，而以其餘畀之，是故明君在上，則竟內之民無凍餒者矣。此之謂上下之際。注輝周禮作韡，謂韡磬皮革之官也。翟謂教羽舞者也。○曲禮凡祭於公者，必自徹其俎。注臣不敢煩君使也。疏此謂士助君祭，若大夫以上，君使人歸俎。○春官大宗伯以脤上忍反。膳之禮，親兄弟之國。注脤，膳社稷宗廟之肉，以賜同姓之國，同福祿也。兄弟有共先王者。疏二王後及異姓有大功者，得與兄弟之國同。○秋官大行人歸脤以交諸侯之福。注交有往來之義。○左傳劉康公成肅公會晉侯伐秦，成子受脤於社，不敬。劉子曰：「祀有執。」

燔戎有受脤神之節也。今成子惰，棄其命矣，其不反乎？注脤，宜社之肉也。盛以脤器，故曰脤。宜，出兵祭社之名。燔，祭肉。○又會于葵邱，王使宰孔賜齊侯胙曰：天子有事於文武，使孔賜伯舅胙。齊侯將下拜。孔曰：「且有後命。」天子使孔曰：「以伯舅耄老，加勞，賜一級，無下拜。」對曰：「天威不遠，顏咫尺，小白余敢貪天子之命，無下拜，恐隕越於下，以遺天子羞，敢不下拜。」下拜登受。注胙，祭肉。尊之比二王後，八寸曰咫。隕越，顛墜也。據天王居上，故言恐顛墜於下。○又皇武子曰：「宋先代之後也，於周爲客。天子有事燔焉。」注有事，祭宗廟也。燔，祭肉。尊之，故賜以祭肉。○春秋定公十四年，天子使后尚

來歸脤。〔注〕石尙天子之士。脤祭社之肉。盛以脤器。以賜同姓。諸侯親兄弟之國。與之共福。○〔少儀〕爲人祭曰致福。爲己祭而致膳於君子曰膳。〔附〕練曰告。凡膳告於君子。主人展之。以授使者於阼階之南。南面再拜稽首。送反命。主人又再拜稽首。其禮犬牢則以牛。左肩臂。牖折九箇。少牢則以羊左肩七箇。牖音特豕則以豕左肩五箇。〔注〕此皆致祭祀之餘於君子。攝主言致福。申其辭也。自祭言膳。謙也。〔附〕練言告。不敢以爲福。膳也。展省具也。折斷分之也。皆用左者。右以祭也。羊豕不言臂牖。因牛序之可知。

按饋祭肉。古人重其禮如此。孔子所以必拜受。言再拜稽

首者饋尊者之辭平敵當再拜不稽首

檀弓顏淵之喪饋祥肉孔子出受之入彈琴而后食之注彈琴以散哀也

酒考

戰國策帝女令儀狄作酒禹飲而甘之遂疏儀狄絕旨酒曰後世必有以酒亡其國者○天官酒正掌酒之政令以式法授酒材注

式法作酒之法式作酒既有米麴之數又有功沽音古之巧功沽善惡也

○又辨三酒之物一曰事酒二曰昔酒三曰清酒注事酒酌有事

者之酒其酒即今之醪酒也冬釀春成昔酒今之會久白酒所謂舊醪

者也。清酒。今中山冬釀。接夏而成。○月令仲冬乃命大酋。秫稻必

齊。麴蘖必時。湛

音尖

熾必絜。水泉必香。陶器必良。火齊

才計反

必得。兼

用六物。大酋監之。毋有差貸。

音式

〔注〕酒孰曰會。大酋者酒官之長也。

於周制則為酒人。秫稻必齊。謂孰成也。湛。漬也。熾。炊也。火齊。腥孰

之調也。物猶事也。差貸。謂失誤。有善有惡也。○秋官萍氏。幾酒。謹

酒。〔注〕幾酒。苛察沽買過多。及非時者。謹酒。使民節用酒也。書酒誥

曰。有政有事。無彝酒。〔疏〕萍氏主水禁幾酒者。酒亦水之類故也。

浮萍

入水不溺。以此取

義。酒亦能溺人。不得非時。謂若酒誥。惟祀茲酒。及鄉飲酒。及昏

娶。為酒食。以召鄉黨僚友。是其時也。○內則。飲重醴。稻醴。清糟。黍

醴清糟、梁醴清糟、[注]重陪也。糟醇也。清，湧也。致飲有醇者，有清者，陪設之也。○[射義]酒者所以養老也，所以養病也。

飲酒考

[樂記]夫豢豕爲酒，非以爲禍也，而獄訟益繁，則酒之流生禍也。是故先王因爲酒禮，壹獻之禮，賓主百拜，終日飲酒而不得醉焉，此先王之所以備酒禍也。[注]言豢豕作酒，本以饗食養賢，而小人飲之善醕，以致獄訟，壹獻士飲酒之禮，百拜以喻多。○[鄉飲酒義]孔子曰：吾觀於鄉，而知王道之易易也。主人親速賓及介，而衆賓自從之，至於門外，主人拜賓及介，而衆賓自入，貴賤之義別矣。三揖

至於階三讓以賓升拜至獻酬辭讓之節繁及介省矣至於衆賓

升受坐祭立飲不酢而降隆殺之義辨矣工入升歌三終主人獻

之工升堂歌鹿鳴四牡皇皇者華每一篇一終笙入三終主人獻之笙入立於堂下奏南陔白華華黍每

一篇一終間歌三終間代也堂上歌魚麗堂下笙由庚堂上歌南有臺堂下笙由儀此

爲三合樂三終堂上下歌瑟及笙竝作舊說工歌關雎笙吹鵲巢

與笙皆應之耳鵲巢三詩非笙詩也工告樂備遂出一人揚觶乃

立司正焉知其能和樂而不流也賓酬主人主人酬介介酬衆賓

少長以齒終於沃洗者焉知其能弟長而無遺矣降說屢升坐脩

爵無數飲酒之節朝不廢朝莫不廢夕賓出主人拜送節文終遂

焉知其能安燕而不亂也。貴賤明，隆殺辨，和樂而不流，弟長而無
遺，安燕而不亂，此五行者，足以正身安國矣。彼國安而天下安，故
曰：吾觀於鄉，而知王道之易易也。

按鄉飲酒之禮有四：一則三年賓興賢能，二則卿大夫飲
國中賢者，三則州長習射飲酒，四則黨正蜡祭飲酒。鄉飲
酒義篇亦言黨正飲酒，正齒位之事。云六十者坐，五十者
立，侍以聽政役，六十者三豆，七十者四豆，八十者五豆，九
十者六豆，此皆鄉中禮飲。鄉黨所記則鄉人有時會聚飲
酒耳。又禮飲賓出有奏陔之禮，賓至階間而陔作，奏鍾師

九夏之祓音咳夏恐賓醉失禮故奏之王朝祓夏之樂有牘

應雅三器以竹爲之舂於地以節行步鄉飲奏咳唯擊鼓

奏之常飲無其事

玉藻君若賜之爵則越席再拜稽首受登席祭之飲卒爵而俟君

卒爵然後授虛爵注不敢先君盡爵○又君子之飲酒也受一爵

而色洒先典如也二爵而言言音斯禮已三爵而油油以退退則

坐取屨隱辟而后屨坐左納右坐右納左注洒如肅敬貌言言和

敬貌斯猶耳也油油說敬貌禮飲過三爵則敬殺可以去矣隱辟

俛逡巡而退著屨也○曲禮侍飲於長者酒進則起拜受於尊所

長者辭少者反席而飲長者舉未酬音醕少者不敢飲注降席拜受

敬也燕飲之禮鄉尊尊所設尊之所飲不敢先尊者盡爵曰醕○小雅幡

幡瓠葉采之亨之君子有酒酌言嘗之有兔斯首炮之燔之君子

有酒酌言獻之有兔斯首燔之炙之君子有酒酌言酢之有兔斯

首燔之炮之君子有酒酌言疇之傳幡幡瓠葉貌獻奏也酢報也

疇道飲也箋熟瓠葉者以爲飲酒之菹也斯白也炮之燔之者將

以爲飲酒之羞也飲酒之禮既奏酒於賓乃薦羞報者賓既卒爵

洗而酌主人也主人既卒酢爵又酌自飲卒爵復酌進賓猶今俗

之勸酒

按飲酒之禮。主人獻賓。賓啐酒。拜而告旨。言酒美也。主人
受賓酢。卒爵而再拜。崇酒。崇。充也。謝酒。惡言相充實而已。
主人酬賓之觶。奠之於薦右。欲其舉也。賓奠之於薦左。注
云。酬酒不舉。君子不盡人之歡。不竭人之忠也。

又人之齊聖。飲酒溫克。彼昏不知。壹醉日富。**箋**中正通知之人。飲
酒雖醉。猶能溫藉自持以勝。童昏無知之人。飲酒一醉。自謂益
富。夸淫自恣。○又賓之初筵。溫溫其恭。其未醉止。威儀反反。曰既
醉止。威儀幡幡。舍其坐遷。屢舞僊僊。其未醉止。威儀抑抑。曰既
醉止。威儀忸忸。是曰既醉。不知其秩。傳反反。言重慎也。幡幡。失威儀

也。抑抑，慎密也。秘也。也。秩常也。○又賓既醉止，載號載呶。

女交

反。亂我籩豆，屢舞僛僛。是曰既醉，不知其郵。側弁之俄，屢舞僛僛。

音。既醉而出，竝受其福。醉而不出，是謂伐德。飲酒孔嘉，維其令儀。

傳。號呶，號呼譁呶也。僛僛，舞不能自止也。僛僛，不止也。箋。到過側。

傾也。俄，傾貌。○又凡此飲酒，或醉或否。既立之監，或佐之史。彼醉。

不臧，不醉反恥。式勿從謂，無俾大怠。匪言勿言，匪由勿語。由醉之。

言，俾出童羖。三爵不識，矧敢多又。

集傳云。監史司正之屬。燕禮鄉射。恐有解惰失禮者。立司正以

監之。察儀法也。童羖，無角之羖羊。必無之物也。言飲酒者，或醉或不醉，故既立監而佐之以史，則彼醉者所為不吾而不自知。使不醉者反為之羞愧也。安得從而告之，使勿至於大怠乎。告之若曰：所不當言者勿言，所不當從者勿語。醉而妄言，則將罰汝。使出童

殺矣。設言必無之物以恐之也。汝飲至三爵已昏。然無所記矣。况敢又多飲乎。又丁寧以戒之也。此衛武公自悔之辭。

藥考

天官醫師聚毒藥以共醫事。注毒藥藥之辛苦者藥之物恆多毒
○又疾醫以五味五穀五藥養其病。注養猶治也病由氣勝負而
生攻其羸養其不足者五味醯酒飴蜜薑鹽之屬五穀麻黍稷麥
豆也五藥草木蟲石穀也○瘍醫凡藥以酸養骨以辛養筋以鹹
養脉以苦養氣以甘養肉以消養竅。注以類相養也○曲禮醫不
三世不服其藥。注慎物齊心

